



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

Tir Yimyim

tiryimyim@aolima

tir yimyim

TAPAK 8

Dalai Lama-i PM Cares Fund nem tenla agütsü

Aung San Suu Kyi anema benokba ken o May 10 nü angadangtsü



VOL. XVIII NO. 193 (ADOK 193) DIMAPUR

RASEMNÜ (WEDNESDAY)

RONGCHII (APRIL) 28, 2021

₹ 5.00

COVID-19 Nagaland: Nisung 207 dak putet

Dimapur, April 27 (TYO): Mongulbarnü Nagaland nung nisung 207 dak Covid-19 aliba putetogo.

Taküm küm asoshi nisung timtiba dak COVID-19 putetba tanü putetba asütsü. Iba ya masüdag Deobarnü nisung 180 dak puteta liasü.

"Tanü nisung 207 dak Covid-19 putet. Parnokji Dimapur nung nisung 177, Kohima nung 13, Tuensang nung 9, Longleng aser Mokokchung nung asemsem (3)

aser Mon o Peren nung kaka (1) lir" ta Health & Family Welfare Minister, S Pangnyu Phom-i metetdaksü.

"Maneni, tanü nisung 16 taneptsü angu. Parnokji Kohima nung 8, Dimapur nung 7 aser Wokha nung 1 lir" ta paisa ashi.

Tanü putetertem züingsema Nagaland nung nisung ajak agi 13,445 kümogo aser parnok rongnungi nisung 12,151 taneptsü nguogo. Tang nisung 874 anepaludar.

Civil Secretariat complex-i nisungtem arutsü memelar

Dimapur, April 27 (Agencies): Nagaland nung Covid19 kanga putetba nung ajemdaker Nagaland Civil Secretariat complex-i nisungtem aruba noktangogo.

Secretariat nung mapa inyakertemi checking staff dang identity card sayuba sülen ang telungi aittsü akok, ta Mongulbarnü Home Department-i sangdong ka nung metetdaksü.

Nagaland Civil Secretariat

nung inyakertemi tangar anir marutsü aser SOPs benshitsu. Directorates/districts nungi nodal officers, officers aser staff-i secretariat nung under secretary ser tempur ketdangsur nungi temelaba meshiba sülen ang complex telungi aittsü akok, ta Home Department-isa ashi.

Nisung tangar kar Secretariat-i aotsüsa kümra home department nungi temelaba meshitsu, ta parnokisa ashi.

NSF lokti mungdang anogo ka dang amongtsü

Kohima, April 27 (TYO): April 30, 2021 nü Solidarity Park, Kohima nung Naga Students' Federation (NSF) indang 29 buba General Conference alitsü.

Iba mungdang ya Manipur kübok Ukhrul Town nung anogo asemnü amongtsüba sentong renema liasü saka Covid-19 wara ajanga Kohima nung anogo ka dang amongtsüsa aküm.

COVID-19 tenokdangbatem ajanga iba mungdang nung nisung 150 nungi 200 shi dang adentsü.

"Tanü tashi nung NSF tir atema candidate pungu aser tongti tezülur atema candidate ana tenü agüja lir" ta Election Commission indang Chief

Commissioner, Elu Nding-i ashi.

April 29 nü nomination forms agütsü aser April 30 nikongdang 3:00 ako nungi 5:00 ako tashi nung secret ballot ajanga vote enoktsütsü. Kasa anogo nungsa iba osang metetdaksütsü, ta paisa ashi.

NSF nung federating unit shia vote anana enoktsütsü aser vote ajak agi 34 lir, ta Elu Nding-isa shisem.

Iba mongdang nung tetushi süa jaokertemji taoba NSF president aser Housing & Mechanical Minister Tongpang Ozukum, taoba NSF president aser MLA Y Vikheho Swu aser The Morung Express publisher Akum Longchari nungertem lir.

Assam nung night curfew tenzükogo

Guwahati, April 27 (Agencies): Assam nung nisung aika dak Covid19 putetba atema Mongulbar aonung nungi night curfew alitsü ozüing agütsüogo.

Assam sorkari April 27 nungi tenzükur May 1, 2021 tashi aonung 8:00 ako nungi anepdang 5:00 ako tashi night curfew alitsü metetdaksü.

Koda masürtem dak alaka iba mapang nisung senzusenbong mesüdagtsütsü, ta Assam sorkari tetuyuba agütsüogo.

"Iba tetuyuba ya tanü nungi tenzükur aser May 1, 2021 tashi alitsü" ta Assam chief secretary Jishnu Baruah-i Mongulbarnü

metetdaksü.

"Assam nung COVID-19 tensa meyipa repringdangogo aser idangji nisung aika dak putetba ajitetogo. Anungji, essential & emergency activities/services dak alaka district ajak nung night curfew alitsü nungdak ta onoki bilemer. Iba ya nübortem kümzüka ayutsü tangatetba nung inyaker" ta Jishnu Baruah-i ashi.

Iba tetuyuba alema inyakertem Disaster Management Act, 2005 nung Arlla 51 nungi 60 aser IPC nung Arlla 188 kübok merenshitsu, ta paisa metetdaksü.

Nagaland nung Apr 30 nungi May 14 tashi Covid inyakyim akangshitsu

Dimapur, April 27 (TYO): April 27, 2021 nü Nagaland Cabinet senden amendang April 30 nungi May 14, 2021 tashi COVID-19 inyakyim akangshitsu teletetba agiogo.

Iba osang ya Government Spokesperson aser IT&C Advisor, Mmhonlumo Kikon-i metetdaksü.

"Nagaland nung COVID-19 kanga putetba ajanga iba teletetba agiogo. State sorkari April 29, 2021 nü tetuyuba tasentem agütsütsü aser itemji April 30 nungi mapa küma tenzüktsü" ta Mmhonlumo Kikon-i ashi.

"Tenokdangba agütsüba mapang Nagaland nung shisaliok rejutem, cinema halls, swimming pools, gymnasium, entertainment parks, auditorium, assembly halls, sports complex aser stadium shibangba den

nisung lokti madenshidaksütsü," ta paisa ashi.

"Inter-state arrtsütem nung entry & exit points aser lenmangtem, nisung aser gari senzusenbongba, dokan, shishilembadak, office aser tashidak melamela menatsüpur indang inyakyim tasen kar yanglutsü" ta Advisor Mmhonlumo-isa metetdaksü.

Deputy Commissioner temi anir District Task Force temi pei pei telongtet nung inyakyim benshidaksütsü aser aibelenertem Disaster Management Act 2005 aser IPC kübok temerenshi alitsü, ta paisa ashi.

Nagaland sorkari Covid wara tanabuba anema raratsü renema lir, ajisüaka iba nung sensotem amalitepa meyarira sorkar kijai dangbo takok mangutsü, ta paisa ashi.

"Nisung ajak agi mask enoktsüla, akokba tashi teka metsüktsüla aser nisung o nisung tsüngda tepila ayutsüla. Nagaland nung mask meinoker dang Rs 200 senchi achitsü Cabinet-i lemtego aser ibaji DTF-i mapa küma inyaksü" ta Mmhonlumo Kikon-isa metetdaksüogo.

ARISHI KÜM 18 SER TEMAPURNEM VACCINE ANGATIAGÜTSÜTSÜ:

Nagaland nung May 1, 2021 nungi tenzükur arishi küm 18 ser tempur ajak nem COVID-19 vaccine angati agütsütsü atema Cabinet-i tanü teletetba agiogo.

"Tang tashi nung vaccine 1,86,350 tashi agütsüogo aser state nung vaccine peria dang lir. Linük nung tanga state tem den medemdangra, Nagaland nung vaccine mamshii raksa endokba kanga ajema lir" ta Mmhonlumo-isa ashi.

NHIDCL-i Nagaland nem ambulance 24 tenla agütsü

Dimapur, April 27 (TYO): National Highways and Infrastructure Development Corporation (NHIDCL)-i Corporate Social Responsibility (CSR) ajanga Nagaland nem ambulance 24 tenla agütsüogo.

Mongulbarnü Civil Secretariat Plaza, Kohima nung Nagaland Chief Minister Neiphiu Rio-i ambulance 24 sayatsü.

"Nagaland nung alirtemi timtem ajuruba mapang ka nung NHIDCL-i kanga dang molungsoa tenla tulu agütsüba atema pelar" ta CM Rio-i ashi.

Iba ajanga health sector nung

health infrastructure tajungba akümtsü. District shia nung alirtemi ambulance ajanga teyari tulu angutsü, ta paisa ashi.

Health department-i ambulance tejentem meta talang pilar aliba health centers nung agütsütsü ayongzükur, ta Rio-isa shisem.

NHIDCL-i tenla agütsüba ambulance ji district 12 shia nem kaka agütsütsü aser ambulance 8 ji community health centre balala nem agütsütsü, ta paisa metetdaksü.

"Nagaland nung doctor, nurse aser tanga supporting

staff-i COVID-19 anema rara nung shilem tajung agiba atema pelar," ta Chief Minister Rio-isa ashi.

NHIDCL-i Nagaland state ya linük nung tesentaktep aliba state tajungtem rongnung dendaktsütsünür, ta NHIDCL Executive Director, M. S Deol-ia ashi.

"NHIDCL-i Nagaland nung social development programmes ajanga lokti ajungkettsü meranger, flavoured milk angati lema agütsür aser tzü tajemtsü atema borewell tutsür," ta M. S Deol-isa metetdaksü.

Kütsapo nung mezüngbuba VDB ki yanglu

Kohima, April 27 (TYO): Phek district kübok Kütsapo yim nung Planning & Coordination, Land revenue & Parliamentary affairs Minister Neiba Kronu-i mezüngbuba VDB village ki lapoktsüogo.

December 6, 1976 nü Kütsapo yim nung VDB mezüng tenteta liasü. Iba mapa ya Phek nung taoba deputy

commissioner AM Gokhale-i tenzük aser taoba chief minister Vamuzo Phesao lenisüba kübok state ajungalen inyak.

VDB Kütsapo-i lennir ana bilemteta MGNREGA 2017-2020 kübok azüklen menden ka amentepa atuba ki yanglu.

Parnoki ki tsünglangba asür Phesao aser azükba AM Gokhale Hall tenüing jaloktsüogo.

MGNREGA 2017-2020 kübok yangluba ki ya Padma Shri Gokhale-i lapoktsütsüba sentong liasü saka pa ajungbena April 18 nü asüba ajanga Minister Neiba Kronu-i lapoktsütsüsa aküm.

"Kütsapo ya yim balaka lir anungji Nagaland nung mezüngbuba VDB yimtsüing ta asüba tenüing tajung amer yimdaklirtemi alitsüla. Nenoki tangari ajizüktsüsa mapa tajung maneni inyaksüla" ta Kronu-i o jembidang ashi.

Iba sentong nung VDB

secretary Vechikhoyi Lohe-i VDB Village Kütsapo indang osang metetdaksü aser DRDA Phek project director Ruzukhrii D. Vasa, taoba NDPP candidate Kupota Khesoh aser taoba Chakhesang Public Organization tir Sovenyi nungertemia o tatsütsü jembii.

Sentong nung Phek deputy commissioner Razouvolie Dozo, Phek SP Vesupra Kezo, Phek BDO Kuhuchiyi Vadeo aser NDPP Phek Region president Mosonyi Domeh nungertem aden asür Phesao kinungtsü Sano Vamuzo aser asür Gokhale'er kinungertemi züluba shiditem zünga metetdaksü

Nagaland nung Class 1 aser Pre-school Admission atema metetdaksür

Kohima, April 27 (TYO): Nagaland nung arishi küm 6 ser tempurtem Class-1 nung aser arishi küm 3 nungi 6 tashi tanurtem Pre-school/anganwadi/balvatika nung admission südagtsütsü ta Department of School Education (DoSE)-i metetdaksüogo.

RTE Act, 2009 aser NEP, 2020 den ano April 15, 2021 nü sorkari tetuyuba agütsüba nung ajemdaker Principal Director Shanavas C IAS-i Mongulbarnü iba osang metetdaksü.

Iba tetuyuba ya mapa küma tenzükogo saka iba sangdong magütsüdag agüja aliba arishi

küm telemsa nung mesüi pre-Schools/ Class I nung admission süa aliba tanurtembo iba tetuyuba kübok madentsü ta paisa ashi.

Nagaland nung school tekolapur ajaki iba tetuyuba sülen anidaksü metetdaksür, ta Principal Director-isa ashi.

State kübok tesem balala nung mi lendong atalok



Fire Personnel temi Tzudikong Town, Wokha, Mokokchung aser Kohima nung mi remseptsü merangba noksa nung angur.

Dimapur, Rongchii/April 27 (TYO): Teyong Ward, Tzudikong Town nung kitsük-kirong lendong ataloka lir ta April 27, 2021 anepdang 9:04 ako nung osang aruba sülen Fire Station Tuli nungi Fire & Emergency Services team ka iba mi remseptsü asoshi oa liasü.

Fire Tender asem den hadir tabensa aser Fire Personnel teperi oa mi ya remsepa liasü. Iba mi lendong ya electrical short circuit nungi adok südi ta temolung melemi lir. iba lendong nung ki ana den yangji aliba ki oset, document aser sen 30,000 rongdoka liasü aser osettsüset sen lakh 2.84 jenjang rongdok.

Ajisüaka mibener tem mapang shidak nung aoba ajanga mi ya temeket tesemtem nung kaoloka aotsü aliba nungi kumzüik. Iba lendong nung asü-amaba meliasü. Iba lendong nung mibener ya Duty Commander ASI Y Pangai Konyak-i anir oa liasü.

Railway Station anasa 10th Mile nung morok mi adoka lir, ta April 26, 2021 nikongdang 6:02 ako nung osang aruba sülen Fire

Station Tuli nungi Duty Commander Nk/Clrk Akuto Asumi-i anir Fire & Emergency Services team ka oa iba mi ya remsepa liasü. Mi remseper mapang shidak nung aoba ajanga iba mi tuluba jangrua aotsü aliba nungi nokdanga liasü.

Bhandari village, Wokha nunga April 26, 2021 anonung 10:45 ako meta morok mi adoka lir, ta osang aruba sülen Fire Station Wokha nungi Duty Commander ASI Bumo Hayang Chang-i anir Fire & emergency Services team ka oa liasü. Iba mi lendong atalokba ya Fire Station nungi kilometer 60 shi pilar liasü.

Iba mi lendong adokba ya tejangja memetet aser iba lendong nung süngiang aser süngdong den aonsotsü sen lakh 3 shi jenjang rongroka liasü. Saka mi remseper mapang shidak nung oa atongba ajanga mi ya aziüktet aser temeket tesem nung kaoloka aotsü aliba nungi nokdangteta liasü.

Fire Team ajanga ghonda ka ser minute pongu agia iba mi remsepa liasü.

April 26, 2021 aonung 8:30 ako aser 11:00 ako meta Sewak Gate nung morok mi adoka lir, ta osang aruba sülen Fire Station Mokokchung nungi Duty Commander ASI Meyilemba Jamir-i anir Fire & Emergency Services team ka hadir tabensa aser mi remseptsüpur nübu teperi oa liasü.

Nüburtem mükumdangba nungi mi ya adok, ta osang ajanga ashi. Ajisüaka mibener temi mapang shidak nung telangzüba agüja mera agiba ajanga mi ya aziükteta liasü.

Maneni April 26, 2021 nikongdang 4:38 ako meta NIELIT, Kohima anasa morok mi adoka lir, ta osang aruba sülen Fire Station Kohima (North) nungi Duty Commander SI Inaka-i anir Fire & Emergency Services team ka iba mi remseptsü oa liasü.

Mibener temi mapang shidak nung telangzüba agütsüba ajanga mi ya remseptet aser talila kaoloka aotsü aliba nungi nokdanga liasü. Iba mi lendong tenzüikba kuli tejangja monguteti lir.

Minister Temjen Imna Along-i DGC ketdangsürtem den senden amen

Dimapur, Rongchii/April 27 (TYO): Dimapur Government College nungi COVID-19 positive cases nisung pezü dak putetba sülen Minister, Higher Education and Tribal Affairs, Temjen Imna Along ajanga college indang principal, vice principal aser tesayurtem den senden ka Tourist Lodge, Dimapur nung April 26, 2021 nü ayongzüka mena liasü, ta sangdong ka ajanga ashi.

Iba senden nung Minister

nem College nung COVID-19 tashidak putetba aser iba atema mera balala agiba indang osangtem agüja liasü. Minister-i tsüingsü apu tenzüiktsü ajungshi aser kaketshir aser tesayurtem dang khuret angateta inyaksangshitsü ayongzüka liasü.

Hostel nung alir ajunga dak COVID-19 ali-mali tejangja metettsü asoshi Minister-i campus nung college ajanga lapoka aliba hostel nung alir tetsür aser teburtem dak

COVID-19 tendangtsü atema RAT testing kits agütsütsü nangzüka liasü.

Tang tashi par pongu den ajurutepa alirtem (primary contacts) indang osang ano maru lir, aser iba osang ya aruba sülen ang college ajunga shibangtsü asü masü, ta telemtetba agütsü. Kasa mapang April 28, 2021 nü nungi tenzüka online class agütsü atema renemshiba mapang lir, ta sangdong ajanga ashi.

Foothill Ao Lanur Telongjem, Dimapur-i Moatsü sentong athir

Dimapur, April 27 (TYO): Foothill Ao Lanur Telongjem-Dimapur-i May 1, 2021 nü Moatsümong benjung amongtsü sentong renema aliba athir ta Mongulbarnü

sangdong ka nung metetdaksüogo.

COVID-19 tensa tamajung akümba nung ajemdaker iba telemtetba agiogo, saka iba anogo nung raffle asayatsü

asosang osangkakettem nung metetdaksütsü, ta Tir Tuden Jamir aser Entrepreneur Committee Convenor Yachet Mollier nati sangdong ka nung ashi.



Frontline Ministry ajanga Aliba Baptist Church nung Mother Heart Skool ka April 22 nungi April 25, 2021 angotem agia liasü. Iba sentong nung shisalen sayur ya Rev. Dr. Toshi Langu aser Limala Sunep na liasü.

Mokokchung nung COVID-19 mozü dose tanabuba agütsü **Dimapur, Rongchii/April 27 (TYO):** Mokokchung jila nung COVID-19 mozü dose mezüngbuba March 17, 2021 tashinung agir alir kisüng nem iba mozü dose tanabuba ya April 29 aser

Dimapur Police-i ozüng nung aibelenertem apu

Dimapur, Rongchii/April 27 (TYO): Dimapur Police ajanga April 25, 2021 nü Burma Camp area nungi nisung ana pua liasü. Tena ya Hekishe yimtsüng nungi tang Purana Bazar, Dimapur nung telidak Angukavi Yeptho aser Asangma yimtsüng nungi tang Ura Villa, Dimapur telidak Toshi Jamir, ta jangjaogo aser tena ket nungi NSCN/GPRN (K) tenüng nung Non Local ID Card tejang 23, NNC (NA) indang Tax slip trok, FGN indang Tax slip 12, NNC Parent Body indang Tax slip ana, NNC/NPGN indang Tax slip pongu aser sen 750 nguteta liasü.

Iba dak sendakba nung ken o ka East Police Station Dimapur nung züluokogo, ta sangdong ka ajanga ashi.

April 27, 2021 nü Dimapur Police ajanga 3rd Mile area nung Shangnyu yimtsüng nungi tang Burma Camp, Dimapur nung telidak arishi küm 31 tain Wangzan Konyak pua liasü.

Pua alisang ya NSCN (IM)

30, 2021 anogotem agütsü, ta sangdong ka ajanga metetdaksü. Iba sangdong ya Mokokchung jila temeket nung aliba vaccination centre tem asoshi alitsü, ta ashi.

tenüng nung truck driver tem dang sen meshia lia apu aser pa ket nungi sen 2500 nguteta liasü. Iba dak sendakba nung ken o ka East Police Station Dimapur nung züluokogo, ta sangdong ajanga ashi.

Dimapur Police-i April 25, 2021 nü Ratanpur village, Dist - Karimganj, Assam nungi arishi küm 27 tain Salim Uddin pua liasü. Auyaba ken o ka nung iba nisungba ya Karimganj Police, Assam ajanga bushia liasü.

Pa ket nungi azük aser naro amala (jewellery) oset teku (9) nguteta liasü aser iba sülen pua alisang den pa ket nungi ngutetba osettem ya Karimganj Police nem agütsüogo, ta osang ajanga ashi.

Chandmari Police Station, Assam nung gari auyaba ken o ka züluoka aliba dak sendakba nung East Police Station Dimapur nungi sepaitemi April 27, 2021 nü Dimapur nung Bolero Pick-Up ka nguteta liasü. Iba gari ya Assam Police nem agütsüogo.

Kohima nung an metsüba training agütsü



Dimapur, Rongchii/April 27 (TYO): State Agricultural Management & Extension Training Institute (SAMETI) aser National Institute of Agricultural Extension Management (MANAGE) den lungjemer ATMA, Kohima district ajanga Poultry Management indang training ka anogo trok (April 19-24, 2021) tashi agüja liasü.

Iba training nung shisalen sayur ya Farm Manager, Dr. Thepfudithou Shüya aser BTM Tseminyu Block, Dr. Vibelie Keretsü na liasü.

Yimdak yimtsüngtem nung aliba lanurtem nem Agri & Allied area nung training agüja mapa inyakdaksütsü aser jenjang ajungkettsü nükjidong nung iba training ya ayongzüka liasü.

Iba training mapang Poultry Management kübok onük tongtipang ana- "Poultry feed Management" aser "Disease and Preventive measures in poultry farming"- lemdanger agia liasü.

Training nung shisalen sayurtemi parnoki ajangshiba nung ajemdaker tashidak wara nungi jenbua alitsü, chiyongtsü agütsüba yimya, mapang shidak nung chiyongtsü shidak agütsüba indang shisa lemsatapa liasü.

Tang shishilempaba tsütsü an metsüba ya kanga kera ainba aser tajangzüik timtiba anguba business ka lir, anungji lanurtemi dangar nem taa agütsür mapa inyaker meyui pei sasa pei li nung inyak tenzüiktsüla, ta Dr. Shüya-i ashi.

Iba training mapang parnoki an metsüba tesem semdanga shisalen sayuri an metsüdak mürekmejutsü yimyatem rasaa shia liasü. Kasa mapang, training nung adener dang an metsüdang mapang balala nung chiyongtsü balala agütsüba indanga sayua liasü.

Iba training sentong nung Kohima district kübok yimtsüng balala nungi lanur 17 arua dena liasü aser shilem agirtem nem kulikaket agüja liasü.

Sumila Ronghangpi asüba atema Assam Governor-i enquiry committee tentettsüogo



Arishi küm 9 tain child activist Licypriya Kangujam-i asür Licypriya Kangujam atema temeten meshia lungkak aitba noksa nung angur.

aser lungkak aiter. Anungji, IAS ketdangsür Moloy Bora-i la asüba kulitem bushitsü aser lungkak aiterem azüoktsü atema lenmang bushiteptsü.

April 26, 2021 nungi tenzüker anogo 30 tsüingda enquiry committee-i osang agütsütsü mapang latettsüogo.

Arishi küm 12 tain tanur tetsür Sumila Ronghangpi ya Raha, Assam nung Prakash Borthakur'er kidang kilir ama tenzüka liasü aser April 22 nikonngang la mi agi rongset.

La asüba sülen police-i bushisüingdanga aodang la mi agi marongdang süadoker liasü ta kuli bushitet aser iba jagi police-i Prakash aser par jabaso Nayanjyoti Borthakur na Nagaon nung apu.

Tanur tetsür dak tashiyim agi shi nung medem aser iba jagi la mashisa liasü ta Assam State Commission for Protection of Child Rights (ASPCR)-i kuli ka agüja ken o benok.

Tanutsüla ya West Karbi Anglong kübok Sar Kro Kudam Ronghang nungi liasü. "La aliba kiburtemi la soset ta onok dang mezüing osang sangoktsü. Onoki bushisüingdanga aodang taitsü aketba ajitet" ta police superintendent Gaurav Abhijit Dilip-i ashi.

"La dak mi senoktsü. La ya

anaprang tesülen alener süngzü agi alenseter aliba angu.

Iba tatalokba atema NGO temi RIMS director aser Dean (Academics) na mapa nungi anentsütsü takhangba agütsür.

Arishi küm 22 tain Sanaton Athokpam ya Regional Institute of Medical Sciences (RIMS) nung fifth-semester MBBS student ka liasü.

March 15, 2021 nü pa hostel taktang nung teka

anaprang tesülen alener süngzü agi alenseter aliba angu.

Iba tatalokba atema NGO temi RIMS director aser Dean (Academics) na mapa nungi anentsütsü takhangba agütsür.

Arishi küm 22 tain Sanaton Athokpam ya Regional Institute of Medical Sciences (RIMS) nung fifth-semester MBBS student ka liasü.

March 15, 2021 nü pa hostel taktang nung teka

anaprang tesülen alener süngzü agi alenseter aliba angu.

Iba tatalokba atema NGO temi RIMS director aser Dean (Academics) na mapa nungi anentsütsü takhangba agütsür.

Arishi küm 22 tain Sanaton Athokpam ya Regional Institute of Medical Sciences (RIMS) nung fifth-semester MBBS student ka liasü.

March 15, 2021 nü pa hostel taktang nung teka

anaprang tesülen alener süngzü agi alenseter aliba angu.

arishi küm 12 dang liasü ta onoki angazükogo aser Prakash Borthakur o par jabaso Nayanmoni Borthakur na puogo. Onoki maneni bushisüingdang südar" ta Dilip-isa metetdaksü.

Tanutsüla ya par kidang küm 5 tashi kilir ama inyaka aru aser ibaji ozüing alema liasü, kechiyong arishi küm 14 ser teküpok tanurtem kilir ama mayutsü ozüing lateta lir.

Sumila Ronghangpi-i lar kidang aotsü mepishiba sülen lar kiburtemi la dak kerosene shiloktsür mi senoktsü ta tai tonglokja lir.

Iba osang ya Assam police DGP Bhaskar Jyoti Mahantia jangjatsüogo.

Külen, Tripura chuba jabaso Pradyot Kishore Manikya Debbarma-ia Sumila Ronghanpi atema temeten meshioigo.

Assam sorkari iba ken o atema mapa inyaksüla ta Pradyot Manikya-i Assam chief minister Sarbananda Sonowal dang ashi.

"Sumila dak atalokbaji maaksü ka dang masü saka tanur tetsürtem jilatemi anir orr alar ama ayuba tia sayur. Sumila Ronghanpi-i temeten angutsüla. Assam sorkari mapa inyaksüla" ta The Indigenous Progressive Regional Alliance (TIPRA) tanishir Pradyot-i metetdaksü.

Külen, higher educational institutions indang office ajak nung state sorkari Covid-19 inyakyim aser SOPs lateta aliba ama maparen inyaksü ta sorkarisa ashi.

Külen, higher educational institutions indang office ajak nung state sorkari Covid-19 inyakyim aser SOPs lateta aliba ama maparen inyaksü ta sorkarisa ashi.

Külen, higher educational institutions indang office ajak nung state sorkari Covid-19 inyakyim aser SOPs lateta aliba ama maparen inyaksü ta sorkarisa ashi.

Külen, higher educational institutions indang office ajak nung state sorkari Covid-19 inyakyim aser SOPs lateta aliba ama maparen inyaksü ta sorkarisa ashi.

Külen, higher educational institutions indang office ajak nung state sorkari Covid-19 inyakyim aser SOPs lateta aliba ama maparen inyaksü ta sorkarisa ashi.

Külen, higher educational institutions indang office ajak nung state sorkari Covid-19 inyakyim aser SOPs lateta aliba ama maparen inyaksü ta sorkarisa ashi.

Külen, higher educational institutions indang office ajak nung state sorkari Covid-19 inyakyim aser SOPs lateta aliba ama maparen inyaksü ta sorkarisa ashi.

Külen, higher educational institutions indang office ajak nung state sorkari Covid-19 inyakyim aser SOPs lateta aliba ama maparen inyaksü ta sorkarisa ashi.

Külen, higher educational institutions indang office ajak nung state sorkari Covid-19 inyakyim aser SOPs lateta aliba ama maparen inyaksü ta sorkarisa ashi.

Külen, higher educational institutions indang office ajak nung state sorkari Covid-19 inyakyim aser SOPs lateta aliba ama maparen inyaksü ta sorkarisa ashi.

Külen, higher educational institutions indang office ajak nung state sorkari Covid-19 inyakyim aser SOPs lateta aliba ama maparen inyaksü ta sorkarisa ashi.

Külen, higher educational institutions indang office ajak nung state sorkari Covid-19 inyakyim aser SOPs lateta aliba ama maparen inyaksü ta sorkarisa ashi.

Kaziranga National Park nung 'elephantsafaris' anener

Guwahati, April 27 (Agencies): Assam nung Covid-19 kanga putetba agi Kaziranga National Park (KNP) ketdangsürtemi April 30 nungi park nung elephant safaris shibangtsü telemtetba agiogo.

Iba osang ya Divisional Forest Officer (DFO), Eastern Assam Wildlife Division, Bokakhat-i metetdaksü.

Yaküm Covid-19 wara agi atongba sülen Kaziranga National Park (KNP) shibang aser ita tenet shi lir külen October 21, 2020 nungi ang lapoka liasü.

Iba sülen nungi April 21, 2021 tashi nung bendanger 570 dena nisung 1, 98,595-i park semdangogo.

Bokakhat district administration-i tan ita tetenzüklen tanga state (Northeast state maden) tem nungi KNP semdangi aruba tourists-i COVID-19 negative report bener arutsü tetuyuba agüja liasü.

May 1 nungi Arunachal nung shisaliok reju ajak shibangtsü

Itanagar, April 27(Agencies): Arunachal Pradesh sorkari May 1 nungi higher educational institutions, including colleges, universities, aser polytechnics ajak shibangtsü tetuyuba agütsüogo.

Arunachal Pradesh nung private universities aser central autonomous institutions-i UGC aser ministry of education guidelines nung ajemdaker academic calendars & examination schedules renemtsüla, ta Arunachal Pradesh sorkari metetdaksüogo.

Külen, higher educational institutions indang office ajak nung state sorkari Covid-19 inyakyim aser SOPs lateta aliba ama maparen inyaksü ta sorkarisa ashi.

Form No. 3
[See Regulation-15 (1)(a)] / 16(3)
DEBTS RECOVERY TRIBUNAL GUWAHATI
Suwarna Bhawan, House No. 12, New Town Path, Near Hanuman Mandir, G. S. Road, Ulubari, Guwahati- 781007 (Assam)
Case No.: OA / 26 / 2021
Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.
Exh. No.: 1052
CANARA BANK
-Vs-
MESSERS VIVI READYMADE GARMENTS
To,
(1) MESSERS VIVI READYMADE GARMENTS D/W/S/O- Piskim Kasom, Super Market Dimapur, NAGALAND -797112
(2) MRS. PISKIM KASOM, Resident of House No. 142, Purana Bazar, Dimapur, NAGALAND -797112
(3) MRS. JOYCEE LONGLENG, Daughter of Shimnaohei, Resident of United Colony, GHSSI Half Nagarjan, Dimapur, NAGALAND -797112
28.01.2021 nü Presiding Officer tsüingdang OA/26/2021 benoka liasü.
47,73,148.21/- (application along with copies of documents etc. annexed) meylpa agitsü atema iba akhümtsüba Tribunal-i Act nung section 19(4) kübok summons/ notice indang Application agütsür.
Act nung sub-section (4) of section 19 nung aliba ama nenok dang yamai tuyur:-
i) summons agütsüba sülen anogo semer tsüingda nenoki taochi meshiba kechiba magizüker ta asüba show cause agütsütsüla;
ii) original application nung serial number 3A kübok nenoki agüja aliba properties and assets masü tanga properties mesüra assets osang sangoktsütsüla;
iii) iba ken o angadanga metembang tashi original application nung serial number 3A kübok assets and properties agüja aliba nung teka maitsüla;
iv) Tribunal nungi temelaba magii original application nung serial number 3A kübok security interest adoka aliba tanga assets and properties shia aliba meykodoktsü, tangar nem magütsütsü mesüra mapa kecha meinyaksüla;
v) nenoki secured assets mesüra tanga assets aser kiojen yokdokra item rongsentem madak security interest tashi ngua aliba bank mesüra financial institutions nem yokzüka senji agütsütsüla.
Nenoki written statement ka agütsütsü aser **10.05.2021 anepdang 10:30 ako** nung Registrar tsüingdangi arutsü tetuyuba agütsür, ibaji meinyakra iba application ya na melii dang angadanga telemtetba agitsü.
Given under my hand and the seal of this Tribunal on this date: 20.04.2021.
Registrar,
Debts Recovery Tribunal, Guwahati.

Manipur nung NGO temi 'Justice for Sanaton' takhangba agütsür

Imphal, April 27 (Agencies): Hombarnü Manipur nung 'Justice for Sanaton' kübok kaketshirtem, clubs aser civil society teloktemi ghonda 24 atema Manipur mokdanga liasü.

Arishi küm 22 tain Sanaton Athokpam ya Regional Institute of Medical Sciences (RIMS) nung fifth-semester MBBS student ka liasü.

March 15, 2021 nü pa hostel taktang nung teka

anaprang tesülen alener süngzü agi alenseter aliba angu.

Iba tatalokba atema NGO temi RIMS director aser Dean (Academics) na mapa nungi anentsütsü takhangba agütsür.

Arishi küm 22 tain Sanaton Athokpam ya Regional Institute of Medical Sciences (RIMS) nung fifth-semester MBBS student ka liasü.

March 15, 2021 nü pa hostel taktang nung teka

anaprang tesülen alener süngzü agi alenseter aliba angu.

Iba tatalokba atema NGO temi RIMS director aser Dean (Academics) na mapa nungi anentsütsü takhangba agütsür.

Arishi küm 22 tain Sanaton Athokpam ya Regional Institute of Medical Sciences (RIMS) nung fifth-semester MBBS student ka liasü.

March 15, 2021 nü pa hostel taktang nung teka

anaprang tesülen alener süngzü agi alenseter aliba angu.

Lakhimpur nung Covid19 positive tetsür ka jena ao

Lakhimpur, April 27 (Agencies): Assam nung Covid19 kanga menatepba mapang ka nung Lakhimpur district nung tetsür ka dak Covid19 aliba putetba sülen sorkar mozü ki nungi jena ogo.

Narayanpur nung atalok. Tetsürlaji Ruptoli nung alir aser Dholpur hospital nung positive putetba sülen la jena ao ta osang angazüker. Ajisiüaka, Dholpur police-i la puogo.

Mongulbarnü Narayapur nung nisung 3 dak Covid19 aliba putetogo.

Hombarnü Assam nung nisung 3,137 dak Covid19 aliba putet aser parnok rongnungi 1,153 tashi Kamrup Metro district nungi putet.

Assam nung nisung 3,137 dak Covid19 putetba züingsema tang nisung 17,764 tashi anepaludar.

GOVERNMENT OF NAGALAND
DIRECTORATE OF SCHOOL EDUCATION
KOHIMA : NAGALAND
NO.: ED/AEI-8/2019
Kohima, the, 27th April 2021
NOTIFICATION
In pursuance to the provisions of the RTE Act, 2009 and NEP, 2020, it is hereby notified for the information of all concerned that admission to Class 1 shall be provided to children in the age group of 6+ years.
Further, admission to Pre-school/anganwadi/balvatika shall be provided to children in the age group of 3-6 years.
This notification comes in to force with immediate effect and children already admitted to Pre-Schools/ Class 1 in age groups below the above specified norms prior to the issue of this notification shall be allowed to continue with the same.
Head of Institutions of all schools functioning within the State of Nagaland are hereby directed to ensure that this notification is strictly complied with.
This issues as per the Government directive vide Letter No.DSE/NEP-20/7-49/2020 Dated, 15th April 2021.
(SHANAVAS C) IAS
Principal Director.
Issued by DIPR

Form No.3
[See Regulation-15(1)(a)]/16(3)
DEBTS RECOVERY TRIBUNAL, GUWAHATI
Suwarna Bhawan, House No.12, New Town Path, Near Hanuman Mandir, G.S. Road, Ulubari, Guwahati-781007 (Assam)
Case No.: OA/30/2021
Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.
Exh. No.: 1059
STATE BANK OF INDIA
-Vs-
MESSERS ASKI FOODS
To,
(1) MESSERS ASKI FOODS D/W/S/O- Shri Imlong Chang, C/O. Breeza Resturent, Church Road, Dimapur, Nagaland, Dimapur, NAGALAND-797112
(2) SHRI IMLONG CHANG PARTNER OF MESSERS ASKI FOODS SON OF SRI C M CHANG WALFORD P O AND DISTRICT DIMAPUR, NAGALAND, DIMAPUR, NAGALAND-797112
(3) SRI AYO YEPHTHOMI PARTNER OF MESSERS ASKI FOODS SON OF C M CHANG WALFORD COLONY P O AND DISTRICT DIMAPUR, DIMAPUR, NAGALAND-797112
(4) SRI SHINGATO RENGMA PARTNER OF MESSERS ASKI FOODS SON OF SRI TEKHI JEMU HIGH SCHOOL ROAD P O AND DISTRICT KOHIMA NAGALAND, DIMAPUR, NAGALAND-797001
(5) SRI KATHU KATH RENGMA PARTNER OF MESSERS ASKI FOODS SON OF SRI SHENTHEYI KATH CHUMKEDIMA, VILLAGEDISTRICTDIMAPUR, NAGALAND, DIMAPUR, NAGALAND-797112
SUMMONS
12.04.2021 nü Presiding Officer tsüingdang OA/30/2021 benoka liasü.
Rs.70,68,844.79/- (application along with copies of documents etc. annexed) meylpa agitsü atema iba akhümtsüba Tribunal-i Act nung section 19(4) kübok summons/ notice indang Application agütsür.
Act nung sub-section (4) of section 19 nung aliba ama nenok dang yamai tuyur:-
i) summons agütsüba sülen anogo semer tsüingda nenoki taochi meshiba kechiba magizüker ta asüba show cause agütsütsüla;
ii) original application nung serial number 3A kübok nenoki agüja aliba properties and assets masü tanga properties mesüra assets osang sangoktsütsüla;
iii) iba ken o angadanga metembang tashi original application nung serial number 3A kübok assets and properties agüja aliba nung teka maitsüla;
iv) Tribunal nungi temelaba magii original application nung serial number 3A kübok security interest adoka aliba tanga assets and properties shia aliba meykodoktsü, tangar nem magütsütsü mesüra mapa kecha meinyaksüla;
v) nenoki secured assets mesüra tanga assets aser kiojen yokdokra item rongsentem madak security interest tashi ngua aliba bank mesüra financial institutions nem yokzüka senji agütsütsüla.
Nenoki written statement ka agütsütsü aser **27.05.2021 anepdang 10:30 ako** nung Registrar tsüingdangi arutsü tetuyuba agütsür, ibaji meinyakra iba application ya na melii dang angadanga telemtetba agitsü.
Given under my hand and the seal of this Tribunal on this date: 20.04.2021.
Registrar,
Debts Recovery Tribunal, Guwahati.



TIR YIMYIM

YIMOBILEM (EDITORIAL)

DIMAPUR RASEMNÜ, RONGCHII (APRIL) 28, 2021

Yariteptsüba mapang

Alima nung mapang mapang shia rara adoker, tashidak wara poktetter aser lendong-tödong balala agi alu aser kiojen raksaja nisungtem taküm lia aotsü nungdak agia meperi timtem tulu ajurur, iba ama lendong-timtem mapangji pei kisüng atema rongsen ajangzüksü merangtsüba mapang masü saka takokeribo angati nungdakba purtem yaritsü merangtsüba mapang tajungtiba lir. Alima tongpang tanabuba kanga sashia raraba mapang, France nunger aluyimer takar ka ket nung tsük aika liasü, anungji iba mapang pa dang par medemer kari tsükji jenjang tur ayoktsü asoshi shidang, kechiyong par lima nung rara adokba agi aluyimer aikati alu meyimtet ayawara tenzükba mapang liasü. Idangji, France nungba aluyimsang jagi par medemertem dang, " ibai tsük nung jenjang tur ayoktsüba mapang masü saka nungdakba purtem nem angati agütsütsüba mapang lir," ta langzüba otsü ka ataloka lir. Tanüa asenok tashidak wara tesashi agi meketbanger alima ajaklen nisungtem kangshiba mapang ya tayokertemi nungdak mozü, oset aser chiyongtsü nung jenjang tur ayoktsüba mapang masü saka takokeribo nungdakba purtem nem angati agütsütsüba mapang lir. Ajisüaka, aikati iba lendong mapang ajanga nisungtem ashiokja senotsü ajangzüksü merangba nguogo aser ano tanga kasaji dang bilema alitsü. Tatsüba agi, teni tebang nembangba mask ayokdak dena, angatisa masüyonga tashidak nokdangtsü atema ajaki alitetsüsa jenjang ajemer ayoktsü melen sen ter jenjang sen semer agi ayoker. Joko, tesem kar nungbo covid nokdangba mozü dena jenjang tesümgangtsüka tur 'black' nung ayokba osang lir. Aji oda, tashidak nokdangtsü atema yimteni shishilembadak hopta aser ita junga shibangtsü ozüng agütsütsü imlaseta, iba mapang sen tur ayoktsü atema, joko nisung karbo jangotsü tesem kar nung miima bendena alitsüa akok. Tesümgangtsü kaji, jangotsü nung sen tur ayoktsü sentong yangluba dang masü saka moko sali nung dena jenjang tur ayoktsü atema renemteper. Itemji nisung mulungjang nungi adokba shisatsü memesük, mashikoshi aser morumoru shisatsü agi inyakba mapatem lir. Iba ama mapa inyakeritemjibo, akhi tejen putu mapang Elisha tenzükter Gehazi-i Naman dang pa zütsüra anepba asoshi taa meshir amato sen aser süoshi meshia agiba ajanga, Naman dak aketba zütsüra to pa dak dang masü saka pa dak nungi jakzükba metsü dak teti senmang ama alitsüsa akümba amato ataloktsü. Atangji, Covid-19 tashidak ya tetsübuttsüka lir saka nungdakba purtem nem peii akokba teyaria dena magütsütetsüsa talirabo metsübuttsüla. Covid agi shiranger ta süra asenoki meimer masü saka sempar amato akümer. Ajisüaka, ibai temeim sayutsü mapang tajungtiba lir. Temeim shitakbajibo temeimtsüka tajung asüba agi meimba masü saka temeimtsü maket, tesempatsüka asüba purtem dang meimbajiang temeim lir. Tanü iba temeimji asenok rongnung mozü kidang, pei kidang, pei kiyong aser pei alidak sayutsü nungdaker. Atangji, tang ama alima tashidak wara tamajung agi nübortem amokmerendang asen dak iba tashidak agi mekongshitsüsa kümdanga alibajia tangar yariba mapa tajung ka asütsü. Aji oda, pei dak Covid putetyonga, kodamasüka meshirangra, yimra agi atongba kija agibo mozü kidangi moi, pei kidang kinungertem den memeyoktepi takdang balaka nung lia peisasa anepalutetra, ibajia peisasa pei yariba dang masü saka tangar yariba den kasa asütsü. Tang ama mapang nung ya, yimra manga agi kisüng atong nung mozü ki bushira, ashiko, kodamasü shirangertemang mozü kidang yiptena dena mata teyari mengutetsüa akok. Iba amaji, tang ama alima lendong timtem mapang senso shiai yimkong ajangzüksüsa wainshin aser awashi meteta inyaktsü mapa aika lir. Item ajakji kodang senso shiai ibai bendentsüba mapang masü saka agütsütsüba mapang aser jenjang tur ayoktsüba mapang masü saka angati yariteptsüba mapang ta angatetdir, senso shiai tashidak wara tulu nung yagi pei lima aser nübortem kümzüksü asoshi mapa tongtibang kabosa inyaktetsü.

OLEMSABANG

NABOT LUNG AGI ONSETA SÜDAKTSÜBA AMA DELHI NUNG ALUYIMERI AJURUR

~ Wati Longchar, Serampore

(Yashi adok nungi...)

Yimti nung alir tamburtemji shirnok?

Parnokji Naboter yimer, yimden yimsüsürtem, yim achaayangertem, kiyongertem, aser medemertem. Parnok ajaki iba tsükmenatzü luji tetsü-tebounungi anguba senmang, Naboter atsüki aser aji mayoker ta metet. Saka Nabot sensaker, aluyimer ka dang asü nung phukümer mali asü; ochi o Nabot asoshi kuli asür mali asü. Yezebel-i tiyazü ashiba anga, kechiba süra la chuba kinungtsü liasü. Yimti nung tamburtemji tasü mait, ochi nung menokdaktetba lenirtem lir. Tiyazü o saka chubai ashibaji shitak amai amanger, aser ochi ola madoker. Tanüa sensaker aluyimer atema ochi kuli sütsür mali. Delhi nung Tractor longkak aitba mapang social media nung prokshiba aika fake photo ta jangjaogo. Aluyimer telok anabo madentsü ta atsüngina ogo. Yimti nung alirtemi Nabot atsür adoka lung agi onset. Ano 2 chubatem kaket 9:26 nungji Nabot dang masü, par jabasoa dena tepsetba shia lir. Senmanger mali meshi meshia samadaksü nung dang aliji rakzükttet. Tanüa sen mechi, ali mechi pei nüburi pei nisung tepsetba otsü aika lir. Naga nunger rongnung, talisa Aor rongnung, ali mechi mangatetep aika adoka lir.

Samesa nisung anaji shirnok?

Tanü asüng professional killer aika lir. Sushan Singh Rajput-a tetongi professional killer hire sür tepset ta otsü züngogo, shitak asü masüar ano tatemang o bendang magütsü. Nabot-a samesa nisung ana (mafia, criminal) tangar ashiokja, tiyazü kuli agüja, rakzükkraktema chia-jema aliba nisung anati kuli asüba agi tepseta endok. Sen dang ngurbo nisung taküm kecha hau ta apayua maliba nisung, Tsüngrem anema-a jembitsü marendakba nisung. Lumiba anogo nung Nabot-i kecha mashi, mejembi sür nung tenati noktaker Nabot-i Tsüngrem aser chuba anema jembigo ta tiyazü kuli agütsü. Tsüngrem aser chuba anema jembir yimti tezülen atsür oa lung agi onsetsa endoker. Iba lima tiyazü kuli air jendi lir. Parnokji kiyonger asütsüa akok, medemer, police, lawyer, doctor, pastor, nüchiso bushir telok balala, a.a ashitsü akok. Item pur jagi tiyazü kuli agütsüba tatalokba otsü aika ajangshia arur. Delhi temeküt nung aluyimer longkak media balalai tiyazü kuli agütsüba, internet shibangtsüba aser amokmerenba otsü aika azünger.

Tamarenertemji shirnok?

Chuba den yaritepa, pa nem shisatsü (advice) agütsür telok, ozüng yanglurtem, nübortem timi azüoka ayutsü parnok dak tashi lir. Nübör ajaki parnok nem akhüm tsübu agütsü. Chubaia parnok dang masüngdangi telemtetba kecha magi. Saka parnoki tenarong tajak amai ochi o mangashi, nükpoker amai Nabot mangu; sensaker tenük agi manguba tamarenertem. Tiyazü kuli dak ajemdaker Nabot lung agi onsetsa endoktsü temelaba agütsürtem. Ochi nung noktakba masü, pei menden kümzüka yunüba tamarenertem. Tanüa politic nungbo permanent friend mali ta kati ka pei menden dang kümzüklibo ta sür medemer ashioktsür aser tepsetba otsü aika lir. Parliament aser State Assembly nung bangdak tata menden atema tiyazü jembiba den meyongnem sen agi aliba/ayokba den medemdangtsü akok. Ashiko, bangdak alir aika alu meyimdangi alitsü, aluyimer timtemji kechi, kobala nungdaker memetet alitsü akok, saka cooperate pur, takar den dang jembiteper yangluba temzüng ta aikati ola adoker. Naboter tamarenertem den saku alitsü shibai metet. Yongji September 2020 nung tamarenertem aluyimer sensak tiai yoktsüba telemtetba agiogo ta ayimtener.

Yimti nung alir telokji shir?

Naboter yimertem. Tamburtem aser tamarener dak alaka, Yezebel-i Nabot lung agi onsetsa endoktsü sentong asabaji memetetba telok. Saka ya kechi asü, koda, shitak asü masü ta mebilemdangi tiyazü nung amanger Nabot dak lung agi aon. Political issue kümdaktsütsü atema aluyimer kari Republic Day benjong amungba anogo Mughul yimsüsüri anir yangluba Red fort nung Sikh nunger tamang yimsü wako aser aluyimer telungjem wako asongba agi India temzüng mezüngmeshiogo ta lenir apuba aser aluyimer longkak aitba tashi mait kümdaktsütsü sentong ka asü ta jembir. Tongmelang agi Nabot aser tanü aluyimer telok yamai medemdangtsü akok:

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

NBCC-i May 1 nü Tsüngrem taochi meshia sarasademtsü ayongzüker

Dimapur, April 27, 2021 (TYO): Tang India linük nung coronavirus wara tanaben prokshia nisung aika dak iba tashidak putetba aser nisung aika asüba mapang Nagaland Baptist Church Council (NBCC)-i Nagaland nung alirtem dang May 1 nü ajak longjemer sarasademtsü ayongzüker.

NBCC General Secretary, Rev. Dr. Zelhou Keyho-i sangdong ka ajanga, "Covid wara ajanga asen lima nung tetsübu aser terata tensa ka bener arutsüogo. Asen taküm nung asenoki kodanga iba ama wara majurudang, koba ajanga asenok ajak amokmerener. Alima nung nübur ajak aoksar aser timtemer anungji amangbapurtemi Tsüngrem dang taochi meshitsüla," ta metetdaksü.

"Alima tesem balala, talisa India nung Covid wara ano tanaben prokba mapang nung ajaki Tsüngrem dang taochi meshia sarasademdar ta asenoki amanger," ta pai metetdaksü.

Tang ama tensa ka nung amangbapurtemi longjemer sarasademtsüla, ta shia pai, "Kibong ka ama onoki Baptist züngsem ajak aser Nagaland tesem balala nung Arogotem aser tangartem dang Honibarnep (May 1, 2021) 5:00 ako nungi 7:00 ako tashi

longjemer sarasademtsü mepishia ayongzüker," ta metetdaksü. Kari mission centers-i oa sarasademtsü akok aser Tenla ki anasa alirtemi Tenla kidangi aotsü akok aser tanünga rogotembo kibong züngsemtem den külemi kidang sarasademtsü akok, ta NBCC General Secretary-isa metetdaksü.

Kohima aser Dimapur nunga anogo shia coronavirus case aika kümdar aser yamai dang ora kobi melii asenoki tensa tamajungba ajurutsü, ta shia pai, "Asenoki taoba mapang meyipa reprangdangra Tsüngremi lenmang aisü nung asen sarasadem langzügo. Asenoki ano longjemer Pa nem tenüngsang agütsüdi aser ano maneni asenok dang taochi sayuang ta mepishidi. Pa kijai dang asenok yaritetsü, anungji asenoki sarasademdi," ta metetdaksü.

NBCC-isa Executive secretaries/Directors ajak dang iba tayongzüker ya Arogotem aser pastor tem nem metetdakjang ta shiogo.

Sarasadem onüktem:
1. Tsüngremi ajak azüoker, anungi Pa nem tenüngsang agütsüdi, Tsüngrem sentong kechaia nokdangtsü makok (Yob 42: 2).
2. Iba wara prokba

anentsü atema sarasademdi. Tsüngrem dak taochi talubosa lir (Efesa 24).

3. Taneptsü aser teküzmükba meshia sarasademdi (Anitet 15:26, Yoel 2:13, T. Ken 86: 5).

4. Iba wara agi kongshirtem aser shirangertem asoshi taneptsüba meshia sarasademdi.

5. Iba wara ajanga asüba kinüngertem nem tesünepba tanela agüjang ta sarasademtsüdi.

6. Local lenirtem, linük nung lenirtem aser alima nung lenirtem nem shisatsü agüjang ta asenoki sarasademtsüdi (I Tim 2:1-2, A. Shin 28: 2, Rome 13).

7. Tangar kümzüksü atema pei taküm tenla agüja inyaker health mongintem, shiranger anepalurtem aser frontline workers (paramedics, police, osangbenertem, bankers) ajak asoshi sarasademtsüdi.

8. Iba wara ajanga lenla balala nung kongshia timtemertem atema sarasademtsüdi.

9. Iba wara ajanga lenla balala nung kongshia aliba asen chirnurtem atema sarasademdi.

10. Iba tashidak tajungba angatetsü atema scientist tem nem shisatsü agüjang ta asenoki Tsüngrem dang mepishia sarasademdi.

Russia linük nung ketdangsertemi Khristan shisaliok anemer

Budapest/Moscow, April 27, 2021 (Agencies): Russia linük nung ketdangsertemi Khristan shisaliok anema Khristan shisaliok rejutem aika nung higher education temeden agienogo, ta osang ka ajanga metetdaksü.

Tan ita Ingria nung Evangelical-Lutheran Arogoi ketdangsuba Theological Institute nunga higher education license agienogo, ta religious rights watchdog- Forum18-i metetdaksü.

Ano Russia nung aliba Lutheran College nunga higher

education license agienba sülen College-i court nung ken o ka benokogo.

Russia nungsa Baptist Union College aser Pentecostal Union College indang license-a agienogo, iba dak alia Khristan shisaliok reju aika nung kaketshir tasenpurtem magizüksü tuyuogo.

Russia nung inspectors-i, item school temi federal educational standards alema inyaker, ta tai tongloksüba sülen Khristan shisaliok rejutem anema inyak tenzüka liasü.

Russia nung zünging kübok

tamangba yimsü rejutem aser shisaliok rejutemi federal mapatongtem benshitsü akok saka mebeshinüra mebeshitsü lateta lir.

Russia nung tamangba yimsü organization kar nung adentsü jangrartemi bendanglen masü saka linük nung ang shisaliok bushitsü atema ozüng tasen ka benokogo.

Russia Tir, Vladimir Putin-i tanen makai linük nung aliba shisaliok rejutem nung ambangyima tashi amshitsü meranger, saka nübur aikati ibaji anema ola adoker.

ANO GO ABEN TSÜNGREM DEN

Tobur ajungji tajitetsü maka

"Na tobur tajung, kü temeim; ne dak kecha tajitetsü maket" Solomon Ken 4:7

Asen tetsü-tebou mapang parnok nüknarar O nüknarar tsüngdanung meimtep mapatem kati ka den ajanga tongtepratep ajak benshitetpa aruba angur. Par putu nung tongteprateptsü atema tanü ama ya gol (Machine) kecha maliasü saka par teratet shisatsü (wisdom) ajanga temeimteper yongtsü nung iba kenten kechisarena rajemdakja aru.

Laishiba nung ibaji mesüka Solomon zentet shisashiri Solomon ken kaket nung nüknarar ana tsüngda meimtep kenten yimya nung zülua aliba indang angur. Talisa tapu pezü (4) nung pa atema aierlaji koda jangratemtsü ka, la tobur ajungba nungji tajitetsü tera maket, la dak nungi adokba teronemji asadangra liangmesen aliba tenem aser ungsem tajung mesükba den medemdanga jembi. Tajitetsü makaba Tsüngremi pa mesükba nung yangluba ama asen dak Khrista tobur ajungji alima nem ngudaktsüdi.

Sarasadem

Taochiba Tsüngrem, nai tangar den longjema alitsü, tangar den yariteptsü Ne taochi kü nem agüjangma. Yisu tenüng nung mepishir. Amen

Religious Freedom Report ajanga China aser Myanmar linüktem aitsür

April 27, 2021: Linük 25 nung tamangba yimsü balala sadoka mamangtetba aser reshikangshi jenjang tamajungba akümer, aser item linüktem rongnung tamajungba anaji China aser Myanmar na lir, ta Vatican-i pusemba charity telok kati metetdaksü.

2019-20 küm indang 'Religious Freedom in the World Report' Mongolbarnü (April 23, 2021) nü sayaogo aser iba report nungji yamai shia lir, Niger, Turkey aser Pakistan ama linük kar nungbo nütsüing ajema aliba tamangba yimsütem anema inyaker, coronavirus wara prokba atema minorities nem tai tongloksür, aser minorities nem medical teyari magütsür.

Shidi tapak 800 nung züluba report ya Khristan charity telok-Aid to the Church in Need International (ACN)-i renema liasü.

ACN indang report nung, alima nung tamangertem mejungi reshikangshiba linük 26 "red" category nung züngoka lir. Küm ana tejaklenbo iba report kübok red category nung linük 21 dang liasü saka tangbo linük pezü tali bendenlokogo.

Iba report nungsa "orange" category nung linük 21 lir, küm ana tejaklenbo linük 17 dang liasü.

"Tamangba yimsü nung ajemdaker reshikangshiba aser bendanga züngshiba jenjang ano tamajungba kümogo, aser linük tamajungtiba anaji China aser Myanmar na lir," ta Religious Freedom in the World Report

nung shia lir. China kübok Xinjiang nung Uighur Muslim nung anema meimchir temden alema inyaker aser parnok tepsetbaji 'asalentong yanglur jenti tepsetba' ama mongintemi züngshir.

Taküm February ita nung US Tir Joe Biden administration-i China-i Xinjiang nung Uighurs Muslim nung jenti tepseter, anungji US-i China anema inyaksü renema alitsüla, ta metetdaksüogo.

ACN report ajanga ashiba agi, 2018 küm Beijing aser Vatican na tsüngda tezüngzüktep ka agiyonga China nung Catholic Khristantemi maneni timtem ajurur.

Myanmar nunga meimchir temeden anema inyakba ajanga tamajungba kongshirtemji Rohingya Muslim nung lir, ta ACN-i metetdaksü.

Taküm February 1 nü sepaitemi democracy lenirtem apuba sülen tang sepaitemi yimsütsüba kübok Khristantem densema tanga minorities-i ano timtem tali ajurutsü ta bilemer. Iba linük nung Khristan nütsüingbo shilem 8 shi dang lir.

Africa kübok linük aika nung Islamic telungpurtemi nisung jenti tepseter aser item linüktem rongnung Mauritania, Mali, Burkina Faso, Niger, Nigeria, northern Cameroon, Chad, Central African Republic, Democratic Republic of the Congo, Somalia aser Mozambique densema lir, ta kasa report ajanga metetdaksü.



Calgary, Canada, April 27: Calgary, Alberta, Canada kübok Street Church nung Public health officer ka aser police officer kati Pastor Artur Pawlowski den ken o angatettepba noksa nung angur. Hopta asem tejakdang pai local ketdangsurtem dang coronavirus dak sendakba nung tenokdangba agütsür aliba nungi par Arogo toktsütsü ashiba den ketdangsurtem ya Nazis aser Gestapo den medemdanga jembiba video ka lemsatetpa liasü. Honibarnü YouTube nung inoktsüba video nung Calgary, Alberta, Canada kübok Street Church nung pastor Artur Pawlowski-i, "Gestapo temi tanaben Arogo maka aru," ta ashi. Iba video inoktsüba sülen anogo ana nung iba video ya YouTube nung 130,000 ben dak tali repringogo.

OLONG PAITEP # 5795

1			2					3		
4							5			
						6				
			7							8
		9								
							10			
11						12				
13										

TIPILEN		LANGTSÜNGLEN	
2. Teka mapa tajung - (8)		1. Anepalua inyak - (7)	
4. Anakshinüba - (5)		2. Teptsü - (4)	
5. Süoshi agi tazü - (4)		3. Nok agi raratep - (6)	
9. Aria bilemtep - (7)		6. Kibong aküm - (4)	
11. Ajemalu ozü - (4)		7. Nüji masü - (4)	
12. Tzü an - (5)		8. Taruba küm - (7)	
13. Teben teloktep - (8)		9. Teka shidok - (6)	
		10. Meputep/Mapet - (4)	

OLONG PAITEP # 5794 TELANGZÜBA

TIPILEN :	LANGTSÜNGLEN :
1. Yimlibilem, 4. Anak, 5. Tangar,	1. Yongya, 2. Moko, 3. Marok,
7. Aya, 8. Arong, 11. Par,	5. Teronem, 6. Nung, 8. Amajok,
13. Lemjem, 14. Oagi, 15. Mulung.	9. Jangzü, 10. belem, 12. Rong.

TANÜ TENDAK AROGO MUNG DANG :

Nübur 1 : Tang O lemtep mapangji tenzüker süra nia agenda ka benokdi, asen Ao arogotem aser asen arogo nunga kechiba toklang tenzükertem rongnungi shiner, mangdang mesüra Tsüngremi jembiba tamangdir madoker? Saka amangbapur rongnungiang itemji atoker? Ano revival amala nung sayutsünger tajung kechiba matoker?

Nübur 2 : Aji kecha tai maliako, parnoka asenok ama kibong lir, chirnura lir aser nüngdak ajunga kaner, ano karibo longro ki yanglua takar ama linür, tanura tulur tashitemteter kümdaktsünur iba jagi bendanga magütsüteter sudi.

Alokba : Ata liang! Agendajibo tajunga, saka aji mapa küma odi süra majungtsü, anungji ni shidi, Parnoki Arogo terenlok mapa tetezü kisüjensü ajak anapalutsüla, ainia aotsüla, Arogo officei anogoshia aotsüla, tasür shiranger kidangia aotsüla, birthday ta sadir-a ta cinema hall-a ta, terakzüka lima nung yangerba ki ajak meshiteti aotsüla akümer, taji parnok mangdangi oa shin shina kazünungbo item arogo dutyji shirnoki inyaktsüaka??

Menden : Meeting tatem küma tezüluba osang zügang!!!

Lilir: I. Kilang Ajem, Indisen, Dimapur.

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Bongdang

(n) aou aser süngküm agi chiyongtsü ayutsü yangluba (container)

* Asenoki ngashi aou **bongdang** nung ayur.

Bonglang

(n) tarok nung telongtiba tesem (bottom of a deep place)

* Marok **bonglang** nung anak alir.

NAI-A YA METETTER MA?

INDIA NUNG NÜBURTEMI SAPUA ALIBA TWO WHEELER MODEL KAR (MARCH 2021)

*** MOTORCYCLE**

- Splendor 2,80,0085
- HF Deluxe 1,44,505
- CB Shine 1,17,943
- Pulsar 80,827
- Platina 69,025

*** SCOOTER**

- Activa 19,39,640
- Jupiter 5,40,466
- Dio 3,14,417
- NTorq 2,51,491
- Pleasure 2,03,594



TANÜBO NAI LANGZÜANG

Q. Koba küm IMPRINT Programme tenzüker?

- A.2010 B.2015 C.2018 D.2019

(Taruba adok nung onoki langzüksü)

YASHI ADOK TELANGZÜBA : 1970

SUDOKU # 5838

TELANGZUBA # 5837

			9	8		2		1	5	6	9	3	2	8	7	4	1
5		8			6	3	9		8	3	7	4	1	5	2	9	6
7	9		3			8			2	4	1	7	6	9	5	3	8
9				1			5		1	9	3	6	4	7	8	2	5
	3		8	4	2		1	9	6	8	2	9	5	1	4	7	3
2	1		7	5	9	6		8	4	7	5	8	3	2	1	6	9
4	7	9						3	3	5	6	1	7	4	9	8	2
	5			9					9	2	4	5	8	6	3	1	7
		2	5		8	9	4		7	1	8	2	9	3	6	5	4

OJANG LUTEP # 5381

- KTETELOSEN :
- NGNU :
- KSMAÜ :
- SÜRMEA :
- GSENÜNN :
- ATSMENÜ :
- SÜBMETUI :
- BIDAJEMNG :
- KSTAKOA :
- URUAJ :

OJANG LUTEP TELANGZÜBA # 5380

MONGPU TETEMJEN NUNG METSÜHJANG SHITAK PROKBA AJANGA SÜNGJANG TAJUNG TANGTSÜR

TAN HOPTA ATEMA - KOMA SÜLA ?

Q. Covid-19 tashidak wara agi senzüsenpong aser lokti senden senteptsü mesademi akümba mapang ya arogo ajak nung aonung shia online Bible Study (Lai bushiba mapang) sentong ka tenzüker nunga koma süla ?



Singapore nungi oxygen container tazung bener arutsü atema Mongolbarnü IAF C17 transport aircraft renemshiba noksa nung angur. Covid-19 wara kanga kara prokshia aoba mapang item container tem bener aruba ajanga linük nung tenüngdakba oxygen belenshiba nung teyari agütsütsü. Iba maparen ya MHA-i achaayanga inyakdar.

ECI-i lokti adenshia benjungtepba noktanger

New Delhi, Rongchii/Arpil 27 (Agencies): Election Commission (EC)-i Mongolbarnü, state pongu aser Union Territory ka nung May 2 nü vote azüngba sülen takok angurtem dang tenüngsang agütsüba benjung ayongzüka mamungtsü atema tenokdangba agütsüogo aser iba den election certificates agizüksü atema takok anguba candidate tem nisung ananati dang mintsü tetuyuba agütsüogo.

India nung wara tanaben poktetshiba atema Madras high court-i EC dak tai tongloksüba sülen anogo ishika lir iba tenokdangba agütsüogo. HC-isa, inyakim nung aibelendaksüba atema EC ya nisung tepseter ka ama obendangtsüla ta ashi.

"May 2 nü vote asüngba sülen takok angurtem benjung amungtsü memelatsü. Takok anguba candidate tem Returning Officer ket nungi

election certificate agizüki aoba mapa nisung anati dang meiner aotsü melatsü," ta EC-i ashi.

EC-i, taoba küm August 21 nü Covid-19 wara pokteter aliba mapang election agitsü asoshi tetuyuba agütsür alibatem lepshia metetdaksü aser iba den political party kari parnok tebilemba lemsatepba agizükba sülen parnok timtemi ai ta shisem. EC-isa, political party tem atema election asoshi nüboyimba sentong aser senden dak sendakba nung guideline tem ya chief electoral officer tem nungi parnok tebilembatem agizükba sülen lepareprangshi ta ashi. May 2 nü vote azüngtsü aliba ya Mongolbrnü tetuyuba tasen agütsüba aser 2020 küm August ita guideline agütsür aliba dak ajemdaker inyakshangshitsü, ta EC-i ashi.

Political party balala nem nüboyimba sentong tululu ayongzüka agitsü atema temelaba agütsüba atema EC

aitsüogo. Item sentongtem nung yimden yimsüsürtem densema shilem agirtem timbaka mask mesemi inyakshangshiba nguogo. EC-i Covid-19 inyakim sülen anidaksü atema guideline tem koda tongtibang iba indangbo metetdaksüogo ajisüaka tetuyuba sülen manidakba lenir aser party tem aema parnoki kecha jenjang magi.

Maneni West Bengal assembly elections shilem ti küma lemsar agiba aser health dak sendakba nung tensa mejungi akümba mapang election phase ajak lokteper agitsü atema memulungba atema EC kanga mejungi aitsüogo.

Taküm election ya West Bengal, Assam, Kerala, Tamil Nadu, aser Puducherry nung March aser April ita agiogo aser May 2 nü vote azüngtsü. West Bengal nung election tatembangbuba shilem Brehostibarnü agitsü.

Dalai Lama-i PM Cares Fund nem tenla agütsü

Dharamshala, Rongchii/April 27 (Agencies): Tibet nunger tamangba yimsü lenir Dalai Lama-i, Mongolbarnü PM Cares Fund nem tenla agütsütsütsü mulungtetba sangdongogo. India nung Covid-19 tashidak den kanga pettepa raraba mapang teyari agütsütsü atema iba telemtetba agiogo. "Covid-19 wara ajanga India densema alima ajunga nung timtem tekangshi bener arutsüba ni asadanga arudar," ta pai ashi.

prokshia aoba mapang ka nung India nung aliba adianutem atema aribilemstüba temaitsü ni Dalai Lama Trust dang PM Cares Fund nem tenla agütsütsü atema asüngdangogo," ta pai ashi.

"Iba mapang nung ni wara aziüoktsü atema kanga meranga inyakertem aser talisa yakbang nung inyakertem dang kanga pelaba lemsateper. Wara takaratiba nung süshia aotsü sarasadema atar," ta paisa shisem.

India nung Brehostibarnü nisung 3,23,144 dak covid-19 tashidak potetba sülen tang tashi

nung tashidak menar 1,76,36,307 jungogo aser kasa mapang nung national recovery rate-a 82.54 per cent-i asepzüka aluogo, ta Union Health Ministry sangdong ka ajanga Mongolbarnü metetdaksü.

Centre-i, tang Covid-19 wara pokteter aliba amala jongdak mapang amshitsü atema 2020 küm March ita Prime Minister's Citizen Assistance and Relief in Emergency Situations (PM Cares) Fund ya tenzüka liasü aser iba ajanga timtem nung alirtem nem teyari agütsütsü.



New Delhi nung COVID-19 tashidak agi asürtem arongba tesem nung tashidak agi asür kinungertem asüpila sentong agitsü atema renemtepba noksa nung angur.

Thailand nungi Oxygen Tanker tem India tonga aruogo

New Delhi, Rongchii/April 27 (Agencies): Medical oxygen belenshitsü atema Thailand nungi container tem India tonga bener aruogo aser ano tanker tazungtem Singapore nungi bener arutsü, ta Union Home Ministry-i Mongolbarnü ashi.

Covid-19 tashidak menar timba akümba ajanga medical oxygen tali nüngdaka akümba sülen Thailand nungi bener aruba oxygen container tazungtem ya tang agi tasembenbuba home ministry-i Indian Air Force indang (IAF) transport aircraft tem ajanga India-i bener aruogo.

"IAF-i yasüng Bangkok nungi oxygen container tem bener aruogo. Iba maparen ya MHA-i achaayanga inyakogo. Iba ajanga oxygen belenshiba nung teyari tulu agütsütsü," ta home ministry otongdar kati tweet asüba den IAF tayimtsü nung oxygen container tem inokba noksa dena lemsatep.

Tanga tweet ka ajanga home ministry-i, "Singapore nungi tanü oxygen container tazung bener arutsü atema IAF C17 transport aircraft renemdar. Item container tem bener aruba ajanga linük nung oxygen agi anünga akümba tebilemstü bentettsü," ta ashi.

Oxygen container tem ya mezüng Singapore nungi

Honibarnü bener aru aser Hombarnüa Dubai nungi container kar bener aruogo.

Container tem bener auba tayimtsü asemprongla West Bengal nung anen. Iba nungi container tem oxygen yangludaki bener ao, kong oxygen inoker tenüngdakba tesemtemi belenshitsü.

Kasa mapang nung Irelandia Mongolbarnü India nem oxygen concentrators 700 aser tanga medical supplies tem yoktsü telemtetba agiba metetdaksüogo. Irish embassy sangdong ka ajanga ashiba agi, oxygen concentrator tem ya Bodhbar anepdang India tonga arutsü imlar. "Shirangertem nem mapang shidak nung teyari agütsütsü atema healthcare workers tem yaritsü asoshi Ireland-i India dangi oxygen concentrators 700 yoktsü," ta embassy sangdong ka ajanga metetdaksü.

India nung COVID-19 tanabenbuba kanga mejungi pokteter mozükidang yipden, medical oxygen aser tanga tenüngdakba osetem agia anünga ajanga timtem tulu nung lir. US, Germany, France, Britain, Australia, Singapore, Israel aser tanga linük aika den World Health Organisation aser European Union-i India nem teyari agütsütsü sangdongogo.



Karnataka sorkari state ajunga anogo 15 mokdanga ayutsü sangdongba sülen Bengaluru nung nüburtem pei state-i meyipa aoba noksa nung angur.

High court-i Delhi sorkar aitsü

New Delhi, Rongchii/April 27 (Agencies): Linük yimtiba nung oxygen cylinder tem black nung shishilembatepba osang angazüka mepelaba Delhi high court-i Mongolbarnü lemsatepogo.

HC-i, AAP-i aniba Delhi sorkar aija ashiba agi, inyakim ajak chirepogo kechiyong oxygen cylinders aser Covid-19 agi shirangertem anepaluba mozütem black nung shishilembateper. "Iba ken o ya nenoki mebentettet," ta HC-i ashi.

Okadakisa, "nenoki (Delhi sorkar) maziüktetra onok dang shiang, onoki central govt officer tem dang iba mapa belenzüksü ashitsü," ta ashi.

Justices Vipin Sanghi aser Rekha Palli nati, tang amala

mapang ka ya hoken (vulture) akümtsüba mapang ka masü, ta ashi. "Nenoki black nung shishilembatepba jangjaa ali mali. Iba ya inyakim tajung ka asü?" ta bench-i oxygen refiller tem dang ashi.

HC-isa, Delhi sorkar ozüng alema inyakshangshiba cylinder shishilembartem anema jenjang tapet agitsü tetuyuba agütsüogo. Okadaki sorkar dang black nung shishilembartem puang ta shiogo. "Jenjang tapet agitsü atema nenok dak tashi lir," ta HC-i ashi.

Maneni HC-i sorkar dang liquid oxygen belenshiba dang masü saka oxygen cylinders tem belenshiba dena aziüoktsü shiogo.

(Maneni tapak 10 nung...)



Hopta ka tejakdang Pasquotank County Sheriff temi Andrew Brown Jr. Brown kshassetba indang second 20 video ka police temang nung inoka aliba camera agi tangokba prokshiba sülen Elizabeth City, N.C., nung longkak aiteritem yimtong süa jajaba noksa ka yangi angur.

Aung San Suu Kyi anema benokba ken o May 10 nü angadangtsü

Yangon, Rongchii/April 27 (Agencies): Myanmar indang junta-i Hombarnü sota aliba lenir Aung San Suu Kyi anema benoker aliba ken o angadangtsü aliba maneni thinentüsügo, ta la indang obendangeri ashi. La sota ayuba sülen joko hopta 12 buba la den ajuruteptsü atema parnoki raraa arudar.

February 1 nü military-i civilian sorkar atsüngtokba sülen Myanmar nung mepetmesü tulu adoka lir aser küm ishika democracy inyakyim benoka linük yimsü asüba sülen maneni linük military taziükba nung lir.

Sorkar atsüngtokba sülen nüburtemi tanen makai longkak aita arudar aser item longkak

aitertem military-i tashiyim agi aziüktsü merangdar.

Kasa mapang nung Suu Kyi sota yua lir aser Junta-i la anema ken o trok benoka lir; kong ozüing alema inyaksangshiba aser license maliba walkie-talkies yua aliba atema aitsüba densema lir.

Ajisüaka Suu Kyi dak sendakba ken o angadangtsü atema May 10 nüi thinentüsügo, ta la okatsür Min Min Soe-i Hombarnü ashi.

Suu Kyi sota yur hopta 12buba sülena la den tejak o tejak na chitepa jembitsü atema la indang attorneys nem temelaba magütsür, ta Min Min Soe-i ashi.

"Obendangeri police dang koba jenjang tonger ta

asüngdangba mapang parnoki osang tejangja magütsütetsü ta langzü," ta lai AFP dang ashiba den inyakyim kanga meyilongi aoba ajanga Suu Kyi kanga tezü adanger ta ashi.

"La news aser TV-a merprangdaksüi alitsü ta bilemer. Linük nung tang tatalokbatem la memeteti alitsü," ta lai ashi.

Suu Kyi den majurtepdaksüba den Junta-i mobile data shibangtsüba ajanga taoba mapang ken o angadangba mapang nunga video-conferencing mesütem.

Suu Kyi anema benokba ken o tesashitibaji Myanmar indang official secrets law kübok lir koba May 6 nü Yangon nung angadangtsü.

Chad nung civilian nem yimsü südaktsütsü akhanger

N'Djamena, Rongchii/April 24 (Agencies): Chad nung taoba hopta Tir Idriss Deby asüba sülen mitkar temi yimsü asü tenzüka tashi civilian nem meyipa agüjang ta takhangba agüja Mongulbarnü nüburtemi yimti-yimtong nung longkak aitdang nisung ana asü aser 27 yiru.

Deby asüba sülen Chad nung mangatetep adok aser mitkar temi yimsü asütsü merangba nung tetsükdaksü ajurua küm 30 shi kanga sashia yimsü asüba ajanga lular aliba nüburtem madak takok monguteter.

Mongulbarnü longkak aitdak nungi arishi küm 20 shi tain ka mozüki indang emergency ward-i bener aruba asü aser ano yirur alir nisung 27 anir arua liasü, ta linük yimtiba, N'Djamena nung aliba mozüki ketdangsür kati ashi.

Moundou yimti nunga longkak aiter ka asü, ta tenük kuli alirtemi ashi.

Security forces temi longkak aiter aziüktsü meranger aser ki-o-jen raksaba nokdang, ta tang yimsü tesüdak military council atema odongtar kati ashi.

Sepaitemi sorkar anemer den raradak tesem April 19 nü semdangba mapang Deby ya

asü aser iba sülen military council ajanga yimten rakzüik.

Opposition politician karibo mitkartemi tashiyim amshia sorkar atsüngdok ta ashir aser parnok busemer dang longkak aittsü ajungshir, saka mitkartemi transitional government nung civilian politician, Albert Pahimi Padacke ya ato kilonser ama inyaksü Hombarnü shimteta liasü.

Hombar nikongdang osang ka sangdongba nung military council ajanga longkak aitba nokdang aser linük mangyim tia nung aliba mapang timtem ajurutsüsa longkak maittsüla, ta ashi.

Deby'er jabaso Mahamat Idriss Deby, shiba linük tir ta sangdonga ali, pai anir aliba military council ajanga election agitsü asoshi ita 18 inyaksangshiba ketdangsütsü, ta shiogo.

"Onoki asen linük ya nisung ka tekolakba sür yimsü asüba linük ka mekumda克斯ner. Mitkartem par alidaki (barrack) meyipa aotsüla aser civilian nem lenmang lapoktsütsüla," ta longkak aiter arishi küm 34 tain Mbaidiguim Marabel-i ashi.

N'Djamena tiyonglen yimtong nung sepai mena aliba garitem senzüa liasü.

"Police tem aru aser parnoki tear gas khaloktsü. Saka onoki metsübur," ta arishi küm 70 tain Timothy Betouge-i ashi.

Mongulbarnep N'Djamena kübok tesem kar nung longkak aitertemi gari tetsüing arongba mapang police temi tear gas khaloktsü.

Tekeratiba nung civilian nem yimten tashi agütsütsüla, ta linük balalai ajungshir. Mitkartemi yimten tashi agiba atema African Union-i süoki ia bilemba lemsatepogo aser taoba mapang iba linük nung yimsü süa aliba linük, France aser Chad kidanger linük kari civilian aser mitkar tsüngta tangatetep kati arutsü ajungshir.

Longkak aitertem rongnung France anemer jenti liasü, aser nübur tejangraba anema Deby-i yimsü asüba mapang France-i pa yari, ta parnoki tenüing asener. Social media nunga longkak aitertemi France indang nisan arongba noksatem nguogo.

Libya nung amenoka aliba sorkar anemer telok, Front for Change and Concord in Chad (FACT) ajanga asendenshir Chad mitkartem den raraba mapang Deby ya asü. Parnok ya N'Djamena atongtsü kilometer 200-300 shi lia mitartemi aridoka liasü.

COVID-19 azüoktsü mechi Turkey nung lockdown sangdonger

Ankara, Rongchii/April 27 (Agencies): Coronavirus tashidak tali menatepa aoba aser iba tashidak agi nisung asüba ajemdaksütsü mechi Brehostibarnü nungi tenzüka May 17 tashi linük tesem ajunga nung 'full lockdown' aliba mapang Turks nunger kidang timba alitsüsa akumtsü, ta Tir Recep Tayyip Erdogan-i sangdong.

Hombarnü Turkey nung nisung tasen 37,312 dak COVID-19 putet aser nisung 353 asü, ta health ministry data ajanga sayur, koba April ita tiyongtsülen dang nungi kanga agi tajemba saka alima nung cases timtiba jenjang pezübuba nung lir.

Cabinet senden ka amenba sülen Hombarnü tenokdangba tasen sangdongba mapang, yimti telungzük nung senzütsü asoshi ketdangsür nungi temelaba agitsüla, kaket reju ajunga shibanger online class agitsü aser public transport amshiba nunga nisung tatakzük dang amentsü, ta Erdogan-i ashi.

Tongtipang osettem alitsü aser temang anepalutsü senzüba dak alaka Turks nunger kilung nung alitsüla. Emergency service nung inyaker aser

chiyongtsü aser danga osettem yangluba nung inyakertem iba tenokdangba küboki maiter.

Iba tenokdangba tasen ya Brehostibar aonung 7:00 ako nungi tenzüksü aser May 17 anepdang 7:00 ako nung tembangtsü.

"Europe nung tanem tanemi lapoka aoba mapang, asenok tesülen atsüngzüka maotsü mechi cases ya 5,000 dang tajemba kumda克斯süla. Aji mesüra tourism nungi shishilempaba aser shisaliok tashinung takoksa tulu ajurutsü," ta Erdogan-i ashi.

May ita tiyonglen temeshi ita, Ramadan tembanga kinungertem adenshia benjongba mapang COVID-19 cases tali mekumda克斯sütsü mechi iba mera ya agiba amai ajiteter.

Turkey nung COVID-19 mozü agütsütsü sentong yangluba ama meinyakteter, kong January ita tiyongtsü ka nung tenzüka liasü.

Turkey nung nisung million ti nem COVID-19 mozü doses ana agütsügo aser China dang Sinovac indang CoronaVac mozü tekeratiba nung bener arutsütsü ajungshir. China nungi iba mozü ya doses million 100 bener arutsü züngzüktepa lir.

France-i India nem oxygen generators 8 agütsütsü: Macron



Paris, Rongchii/April 27 (Agencies): France tir Emmanuel Macron-i Mongolbarnü India atema aria bilemba lemsatepogo aser ashiba agi, India nung coronavirus tashidak tanaben poktetshir aliba den raratsü atema France-i oxygen generators ti den ventilator aser tenüngdakba medical equipment tem yoktsü ta ashi. Paisa, generators shia yagi küm 10 tashi ambient air ajanga oxygen adokdaksütetsü aser iba ajanga mozükitem nem teyari agütsütsü, ta ashi.

France tir-i Facebook post ka nung, India nung tensa France-i kanga junga meteta lir aser timtem lendong ataloker aliba mapang linük ana maneni longjemer alitsü, ta ashi. "Asenoki tanga ajangshia aliba wara agi mekongshir shinga mali. India kanga dang timtem tia tamajung ka ajangba mapang ta onoki meteta lir. France aser India na teti longjemer aruogo aser teyari agütsütsü atema maneni longjemer inyaksü. France-i medical equipment,

ventilator aser oxygen generators 8 India dangi yoktsü. Generator shia yagi ambient air ajanga oxygen adokdakja mozüki ka küm 10 tashi tangar dak metaloker malitsüsa teyari agütsütsü," ta Macron-i ashi.

Paisa, "aria bilemtepa ya linük ana tamendakdak teyongtsü lir. Iba ya linük ana tsüngda tangatetep nung aruba teyongtsü lir. Külemi asenoki takok angutsü," ta ashi. Macron-i ashiba agi, India nung tenüngdakbatem peritsütsü atema industry aika den France ministry temi inyakdar.

Hombarnü Ato Kilonser Narendra Modi-i, US tir Joe Biden den sensaksemogo aser vaccine yanglutsü atema tenüngdakba osettem alitsü asüngdangogo. United Kingdom, Ireland, Germany aser Australia-ia India nung mozükitem nem teyari agütsütsü atema oxygen production plant aser ventilator tem yoktsü. Kasa mapang nung China, Taiwan aser Pakistan-ia India atema aria bilemba lemsatepogo.

COVID-19: Jalukie ADC-i nübortem nem tetuyuba agütsür

Peren, Rongchii/April 27, 2021 (TYO): Kidanger district nung COVID-19 positive putetba dak sendakba nung tekümdangtsü mera agia aser iba wara nungi nüburtem kümzüka yutsütsü asoshi, ADC Jalukie, Dr. Tinojongshi Chang-i sangdong ka ajanga nübur ajak dang teküboklen agüja aliba tetuyubatem nung metsüngareta anidaksü asoshi metetdaksür.

1. Jalukie Sub-Division telungtet nung hopta shia amenba/lapokba market (weekly market) ya osang tejangja ka magütsü tashi lapoktsü memelar. Ajisüaka, weekly market mapang Sorkar ajanga lateta aliba SOPs nung anidaka lisopurtemi pei atsü/alu nungi züsentetba süngolemba aser süngjanglijang ayoktsü melar.

2. Shishilembaba tesem/dokan ajak nung teka metsütsü facility/hand sanitizer amshitsüla.
3. Tetuyuba aser SOP nung shia/atazkükja aliba ama, passenger mener senzüba gari ajak nung passanger tatakzük dang melatsü.
4. Covid-19 negative test report medeni tanga (state telungtet) tesem nungi arur ajak pei pei kidang anogo 10 tashi quarantine asütsü atema GBs/Village Councils, Ward Chairmen aser Colony Chairman temi parnok jangatsüla aser item mera nung anidaksü asoshi maparen achaayangtsüla.
5. Tanga State nungi arur ajaki CHC, Jalukie nung lapoka aliba COVID Control Room nung osang agütsütsüla mesüra mobile no. 8732841972/9402728560 ajanga Control Room nung

tongteprateptsüla.
6. Lokti kazüba tesem paidoktsü, yimdong nung senzüdang ajaki tejak nembangba mask inoktsü mera densema Jalukie Sub-Division nung alir ajaki Covid-19 dak sendakba tetuyubatem nung anidaksüla. Enforcement committees aser police densema village/ward tekolakpur ajak dang pei pei tata tesem nung Covid-19 dak sendakba meratem aser SOP tem achaayangtsü asoshi tetuyuba agütsür.

Maneni, tekalen agüja aliba tetuyubatem nung kari danga aibelenra, IPC indang Section-188 kübok temerenshi agütsüba den Disaster Management Act 2005 indang Section 51 nungi 60 tashi agüja aliba tashi amshia tapet temerenshi agütsütsü, ta kasa sangdong nung shia lir.

Diphupar nung UCO Bank shibangtsür

Dimapur, Rongchii/April 27, 2021 (TYO): Covid-19 tashidak prokba azüoktsü asoshi tekümdangtsü meratem agia, DC aser Chairman DDMA, Dimapur, Rajesh Soundararajan-i sangdong ka ajanga, osang tejangja magütsü tashi UCO Bank, Diphupar shibangtsü tetuyuba agütsüogo.

Iba mapang UCO Bank telungtet aser temeküt ajak sanitize asütsü atema achaayangtertemi nungdakba maparen inyaktsü.

Shibangtsüba tesem nung nisung kari danga aibelenba putetra, IPC indang Section-188 kübok temerenshi agütsüba dak alia Disaster Management Act 2005 indang Section 51 nungi 60 tashi agüja aliba tashi amshia tapet temerenshi agütsütsü, ta DC-isa metetdaksü.

Advisor Imnatiba-i training agirtem nem osettsüset lema agütsü

Dimapur, Rongchii/April 27, 2021 (TYO): Changtongya nung Nagaland sorkar kübok Directorate of Employment Skill Development & Entrepreneurship ajanga ayongba "Multi Skill Handyman" training nung adener nisung 37 nem hadirtem lema agütsüogo.

Youth Moulding Center Changtongya Town den longjemer Industries and Commerce, Labour and Skill and Entrepreneurship Department, Government of Nagaland, Advisor, Imnatiba-i training agirtem nem item osettsüset lema agüja liasü, ta sangdong ka ajanga metetdaksü.

Longleng nung CCC & Covid-19 Hospital lapokogo



Longleng, Rongchii/April 27, 2021: DPO (RCH & UIP) & District Media Spoke Person for Covid-19 Vaccination, Dr. Imnameren Phom-i jembiba yangi noksa nung angur.

Longleng, Rongchii/April 27, 2021 (TYO): Hombarnü (26.03.2021), DIET Building nung Executive Secretary, PBCA, Rev. Tialemba Phom-i Covid Care Centre (CCC) & Covid-19 hospital meshiteta sarasademtsür sülen lapokja liasü.

Longleng District nung Covid-19 tashidak puteter timba küma aoba asadanteta aser timtemer tem anepalutsü asoshi iba Care Centre nung maparen tenzükogo.

Medical Superintendent, Longleng, Dr. Lhouvizotuo-i CCC & Covid-19 hospital indang report telok dang metetpeladaksü.

Iba Covid-19 hospital nung yipden 17, Operation Theatre (OT) ka, Labour Room ka, Laboratory ka aser 2 ICU yipden ana den külemi iba Covid-19 Care Centre nung yipden 9 renema lir, ta pai metetdaksü.

DPO (RCH & UIP) & District Media Spoke Person for Covid-19 Vaccination, Dr. Imnameren Phom-i District nung tagidak aliba Vaccination sentong indang osang metetdakja liasü.

Iba sentong nung EAC Headquarter, Longleng Ruokuosetuo Tetso menden liasü, ta sangdong ka ajanga metetdaksü.

**OFFICE OF THE
ONGPANGKONG SENSO TELONGJEM
Dimapur- 797112 : Nagaland**

SANGDONGER

Ongpangkong Senso Telongjem Dimapur (OSTD) Moatsümong May 3, 2021 nü ajak pelatepa amungtsü sentong yanglua liasü, saka tia maka Covid-19 wara tanabenbuba kanga sashia poktetba ajanga memungtettsüsa akümer.

Anungji tensa mapang apir benjong kabo amungtsü ajaki sarasadema atadi.

**Sd/-
TEMSUPOK JAMIR
President, OSTD**

**Sd/-
IMNATOSHI LKR
Gen. Secy., OSTD**

SANGDONGER

Diphupar 'B' Ongpangkong Senso Telongjem 03-05-2021 anogo nung Moatsü benjong mong amongtsü sentong renema aliba alima wara kangadang zeina aoba ajanga iba sentong magitettsü ta sangdonger.

MULUNGNEN O



**Asoba:
25/10/1938**

**Asüba:
15/04/2021**

**MASASOSANG
MEKUMPONG UNGMA**

Onok akhüm, ozü tsürapur shirangba anogo nungi tasüba anogo tashi ozü shisabulu, mangyim jashi nung alidang "Ni inyaktsüla, yaritsüla, anepalutsüla, apusotsüla, aotsüla" ta kija, kibong, kinunger, Arogo Yimten aser Lokti kwinakati nenok tangatetba nung Nübu, Rongsen, Tamang sarasadem agi yaritepogo nenok ajak dang kanga pelar "TEMOAH" ta lemsateper. Ozü pelaba tsüngtong arua melemsetetnungji, Nenok taküm aser kija, kibong ajak asen teyanglur Tsüngremi moajang ta ozü sarasadem.

**Temeim kinungtsü, Jala-Jabasotem, Semchirtem,
Kinungertem aser Anükapang**

Office of the Chungtia Baptist Arogo TENÜNGSANG AGÜTSÜR

Kanga tejak tenteta, Chungtia Baptist Arogo-i Rev. Dr. L Kari Longchar nem Honorary Doctor of Divinity, Senate of Serampore College (University)-i agütsüba tepela tenüngsang agütsür.

Pai Naga lima nung yi meshi meshia samatsütsü atema yi tongpang kanga meranga rara. Iba dak alaka Dr. Longchar-i Naga nunger rongnung yimjung aser tesünep alitsü atema bendanga agüja inyak.

Pai tenzüka aruba wadangtemji:

ABAM nung Executive Secretary ka ama inyak, NBCC nung Director of Peace affairs, Vice President of Naga Reconciliation Commission, aser CBCNEI nung Chairman of Peace and Justice Committee liasü. Aser tanü tashi Peace Channel Governing Board nung teinyakdak lir.

Tasü tait saka ajemalua inyakba taküm, pai mapa tasen aika tenzüka arogotem yangerba den lenir aika ajungmesodaktsür.

Chungtia Baptist Arogo-i tzürabur taküm tarutsü nunga tajungtiba süa aotsü Tsüngremi moajang aser amshiang ta sarasademtsür.

**Sd/-
Rev. M.Laka Tzüdir
Pastor**

**Sd/-
I.Meren Longchar
Secretary cum Cashier**

EntranceHub
Prepare you conceptually & digitally

TARGET MBBS

**INTENSIVE CLASSROOM
PROGRAM FOR NEET 2021**

75 Days
Structured Coaching

2000+
Practice MCQ's

10 National
Level Test Series in OMR Sheets

2 hours
extra doubt clearing sessions everyday

20% OFF | HOSTEL IN CAMPUS

ADMISSIONS OPEN | BOC | kohima | 7005114715

SANGDONGER

Ongpangkong Senso Telongjem, Diphupar, anogo 01/05/2021 nung Moatsü benjung mong amongtsü renema alibaji COVID-19 wara kanga mejungi aoba ajanga iba sentong magitettsü ta sangdonger.

OST Diphupar

World Chess title atema lan aser Carlsen tokteptsü



Moscow, Rongchii/April 27, 2021 (Agencies): Russia nung chess grandmaster, Ian Nepomniachtchi-i Hombarnü 'Candidates Tournament' nung takok nguogo.

Iba takok ajanga, taküm küm tatemlen world title atema pai Norway nung Magnus Carlsen den tokteptsü jenjang ka ajangzüktet.

Covid-19 wara prokba azüoktsü asoshi international filght tem anentsüba mapang,

Moscow nungi kilometer 1,400 shi pila orr lir. Covid-19 prokba azüoktsü asoshi mera tapet agia iba asayamung takok ngua tenzükshio.

"Chess asaya arur tanü iba alizüing tongtetba ya kü taküm nung tuluka asütsü. Ni kanga belemogo. Iba asayamung nung tanaben shilem agitsü asoshi küm ka tashi yongya aser renemshia aruogo," ta asaya akokba sülen, Nepomniachtchi-ashi.

Taoba küm Covid-19 tensa ajanga iba asayamung ajungbena anentsüba mapang, arishi küm 30 tain Russia nung lan ya France nung Maxime Vachier-Lagrave den point kasa shi liasü.

Taküm November ita Dubai kübok ayonga asayatsü aliba World Chess Championship nung world title atema Nepomniachtchi-i Carlsen den asayatsü.

Junior national selector atema Vinod-i tenüing agütsü

Mumbai, Rongchii/April 27, 2021 (Agencies): Taoba mapang India cricket team nungi batsman - Vinod Kambli, shibai 90s mapang Test 17 aser ODIs 104 asayaogo, pai junior national selector atema tenüing agütsüogo.

April 14, 2021 nü junior national selectors indang post pungo atema BCCI-i osang agütsü aser iba post atema apply asütsü tatembangbuba anogo ji April 26, 2021 liasü.

"India nung Cricket wadang tsütsü langka tajung meyipa agütsütsü tebilemba nung, national selector post atema ni apply süogo. Iba wadang ajanga kü taküm ajungket aser India cricket team tali dang akangshidaktsütsü asoshi nia shilem ka aginür; aser asayar tasentem anitetsü asoshi BCCI yaritsü mulunga lir," ta Kambli-i lemsatetep.

Mumbai nungi arishi küm 49 tain Kambli-i century pezü densema Test asayamung nung run 1084 yanglua lir. Kasa mapang, ODIs nung fifty' 14 aser century ana densema pai



run 2477 tashi yangluogo.

Ano külen, first-class career nung abilen batting asüsang Kambli-i asaya 129 nungi run 9,965 yangluogo. Item run rongnung hundred' 35 aser fifty' 44 dena lir.

Tang, Kambli ya Mumbai Cricket Association (MCA) indang Cricket Improvement Committee (CIC) nung inyakdar.

Maneni, BCCI sangdong ajanga angazükba agi, iba post atema shimteter candidate temi Under-23 aser Under-22 telemsa nung team tem jangjatsüla. Mezüing selection committee nung taoba mapang India off-spinner Aashish

Kapoor-i anir Gyanendra Pandey, Rakesh Parekh aser Debasis Mohanty munger züingsem ama inyakogo. Taküm January ita Mohanty ya senior selection panel nung denogo.

BCCI-i ashiba agi, junior national selector indang post atema apply asür temji first-class cricket 25 ben tashibo asayar alirtem, Ranji Trophy asayamung nung State ka nungi shilem agirtem aser tesüiba küm pungo tejkadang Cricket asaya nungi anenertem alitsüla.

Iba panel tasen yagi Under-19 World Cup atema squad shimtsü. Under-19 World Cup ya sangküm New Zealand nung asayatsü.

High court-i Delhi sorkar...

"Mozüki/jurila dangi O2 supply asüba indang kecha mangaoka mali aser ibayongji artificial black market ka kümetogo," ta HC-i ashi.

Delhi Heart and Lung Institute-i, oxygen agi anungba aser nodal officer kechianga mesayangi akümba indang osang agütsüba sülen okadaki iba tetuyuba agütsü.

Kasa mapang nung Delhi HC-i, pharmacy ajak nungi Remdesivir, Dexamethasone aser Fabiflu den tanga mozütem supply asüba idang

mangaoka ayutsü aser black nung shishilembatepba jangjatsü atema audit agitsü tuyu.

Liquid aser gaseous oxygen stock den refillers indang jenjang shisema affidavit ka Bodhbarnü 10 ako tashi nungbo benoktsü atema HC-i sorkar nem tetuyuba agütsüogo.

Delhi sorkar aser police teyari nung emergency supply tem agizükba sülena Deobarnü tashi nung linük yimtiba nung mozükitem aika medical

oxygen agi anünga liasü.

Mozükitem nung oxygen agi anungba ajanga shirangertem aika lendongi aiba sülen Delhi nung mozükitem aikati taoba hopta teyari meshia jondak osang yokogo.

Iba timtem ajanga mozükitem aika nung shirangertem magizüki liasü.

CM Arvind Kejriwal-i Mongolbarnü, Central aser state sorkar na longjemer inyakba ajanga mozükitem nungi jongdak osang aruba tajemba kümogo, ta ashi.

(Tapak 7 nungi...)

Temekok surgery takok ngua agiogo: Natarajan



Mozüki nung Natarajan temekok surgery agir sülen tangokba noksa ka yangi angur.

New Delhi, Rongchii/April 27, 2021 (Agencies): Mongolbarnü, India cricket team nungi 'yorker bowler' takotet, T Natarajan temekok surgery agiogo. Natarajan-i pa temekok nung timtem aliba meteta anepalutsü asoshi tang asaya aliba Indian Premier League nungi taoba hopta tukadok.

Sunrisers Hyderabad team nungi fast bowler, Natarajan ya taküm küm tetenzüklen Australia Tour nung yirua liasü aser iba timtem bener pai IPL nung shilem agi, saka pa temekok agi kanga kangshiba ajanga IPL asayamung nungi tukadoktsü lemtet.

Temekok surgery takok ngua agitettsüsa teyari agütsüba atema Natarajan-i BCCI aser medical team naprongla dang pelaba metetdaktüsüogo.

"Tanü, ni temekok surgery agiogo aser medical team, surgeon, doctor, nurse aser staff takotet temi pai sempet amshia yariba asoshi parnok dang pelaba metetdaktüsür. Iba den külemi, surgery takok ngua agitettsüsa nungitba atema @bccci aser teyariteper ajak dang pelaba

shisemer,' ta Twitter ajanga Natarajan-i lemsatetep.

Tan Indian Premier League 2021 season nung, arishi küm 30 tain Natarajan-i Sunrisers Hyderabad atema match ana dang asayaogo.

Australia Tour mapang Natarajan temekok yirua liasü aser iba nungi taneptsü junga mengui dang pai asaya aruogo.

Iba Tour asayazüker sülen, National Cricket Academy nung pa munga liasü. Iba mapang pa temekok yirur aliba nungi taneptsü mengui lia, ano India aser England tsüingda limited-overs series atema pa asayatsü asoshi temelaba agüja liasü.

Taoba season IPL nung Natarajan-i tasa balala amshia 'yorker' ball aonba ajanga pa nungtugu aküm aser iba sülen Australia nunga India tenüing nungi pai format asempronlga nung takok ngua shilem agiba angazükogo.

Australia nungi Natarajan India-i tanaben meyipa aruba sülen, pa temekok yirur aliba ya nübur dang memetdaktüsü liasü.

Virendra Singh alima nungi pilaogo

New Delhi, Rongchii/April 27, 2021 (Agencies): 'India Hockey' umpire indang manager, Virendra Singh Covid-19 dak sendakba timtem agi asü aser pa iba akümli nungi pila aoba osang angashia iba asaya tentet ajanga mangyim jashi lemsatetepogo.

Hombarnü, Uttar Pradesh kübok Meerut nung Virendra asü. All India asayamung aser National Championship balala nung Virendra-i ketdangsür ama inyakogo. Iba den külemi umpire indang manager ama hockey asayatem atema pai umpire tem shimba maparen nung achaayanga liasü.

Tawa tembangba '56th All India Veer Singh Ju Dev Memorial' tournament aser tetsür indang '5th All India Rajmata Vijay Raje Scindhiya' asayamung nung pai Umpire indang Manager ama ketdangsüa shilem agiogo.

Tanga asayamung rongnung, Virendra-isa '4th Edition of Bangalore Cup Invitation All India Hockey Tournament 2019 (Men) Bengaluru aser All India Swami Shradhdhanand Hockey Tournament 2019 Haridwar,

Uttarakhand nung Umpire indang manager ama shilem agiogo. Indian Railways maparen nung pa mazüing dang aliyongjia, hockey tsütsü pai temulung agüja inyakogo.

Virendra asüba osang angazüka, Hockey India president Gyanendro Ningombam-i, "Anojungi Virendra Singh iba akümli nungi pila aoba osang angazüka, Hockey India-i mangyim jashi lemsatetep. Asaya dak sendakba nung maparen balala ketdang asüba dak alaka, Virendra-i Umpires aser Technical Officials atema Hockey India indang sentong tem nung yakpang ser inyakali.

"Virendra anojungi süadokba ajanga hockey tentettem aoksar. Tang ama mangyim tejashi mapang onoki asür kinungertem aser Virendra'er kibong den asükhu lemsatetep," ta India Hockey-i lemsatetep.

Taoba hopta, nungtugu hockey statistician aser iba asaya putiotsü rajema alisang, Baboolal Goverdhan Joshi-a COVID-19 dak sendakba timtem agi süogo.

BILEMDANGANG

"Telok nung lennir tajung melira nütsüing samar."